



EDISI
BM

PERCUMA
KDN PP11732/12/2012 (052229)

DITUBUHKAN PADA 1966
DI KUALA LUMPUR

Rocket



facebook.com/roketkini

twitter.com/roketkini

roketkini@gmail.com

www.dapmalaysia.org

SEPTEMBER 2016

M01 / RM4.2B

TANGKAP
MALAYSIAN
OFFICIAL!



NOTA EDITOR

Tun Dr Mahathir sudah tubuh parti baru. Ia dipimpin seorang lagi bekas timbalan perdana menteri, setelah sebelum ini kita menyaksikan Parti Keadilan Rakyat dikepalai Datuk Seri Anwar Ibrahim. Parti ‘Bersatu’ pimpinan Tan Sri Muhyiddin Yassin disambut dengan reaksi yang pelbagai.

Banyak pihak menghalakan muncung senjata mereka ke arah dasar keahlian Bersatu yang mengutamakan Melayu-Bumiputera, dan mengesampingkan warga bukan-Melayu ke tingkat kedua keahlian sebagai anggota bersekutu. Seolah-olah bikin kenduri doa selamat, dan ahli bukan-Melayu itu hanya sekadar tetamu. Selesai kenduri, berambuslah pulang. Tuan rumah mahu lepak minum kopi sebelum beransur tidur.

Parti baru Mahathir ini lahir daripada keterdesakan untuk mempunyai wahana perjuangan yang bersifat Melayu. Ini sumpahan realpolitik yang kerap kali menyebabkan ramai idealis menjauhi perebutan kuasa. Ada waktunya nilai-nilai yang selama ini dijunjung akan terpaksa dipujuk ke tepi, sementara masalah yang lebih mendesak diselesaikan.

DAP menyambut hakikat politik Malaysia dengan lapang dada, sambil menyatakan kesediaan untuk bekerjasama dengan sesiapa sahaja yang buat masa material bersiap melawan korupsi dan memperjuangkan keadilan sosial, demokrasi, urustadbir yang bersih dan sebagainya.

Parti baru Mahathir ditubuhkan khusus untuk menangani parti lama Mahathir. Kelompok yang sangkut dalam jerat parti lama Mahathir hanya boleh dibebaskan dengan tangan Mahathir. Mereka tidak akan menyambut tangan Lim Kit Siang, Lim Guan Eng, Nurul Izzah ataupun Mat Sabu. Mereka hanya akan menyahut seruan orang yang bertanggungjawab meletakkan mereka dalam keadaan tersangkut begitu. Tersangkut memuji sang Presiden United Malays National Organisation.

Apa yang lebih menarik daripada reaksi orang ramai terhadap parti baru Mahathir itu ialah reaksi Datuk Seri Najib Razak sendiri terhadap Bersatu.

Suami Datin Seri Rosmah Mansor itu begitu pantas melancarkan serangan-serangan ke atas sebuah parti baru yang belum pun diluluskan Pendaftar Pertubuhan. Bapa tiri Riza Aziz itu dengan segera mengaitkan Bersatu dengan sentimen perkauman anti-DAP.

Yang tak menyempat sangat ni kenapa? Kot ya pun bertenanglah dulu. Gagalkan pendaftaran parti baru itu, contohnya. Awak kan Perdana Menteri, kuasa awak di Malaysia ini seluas alam. Takkallah parti nyamuk serpihan parti keramat awak tak boleh dikilas dan dikunci mati?

Ketergesaan Najib ini buat kita terkenang bagaimana PAS bertindak ke atas gerombolan parti serpihannya, Amanah yang dihalau keluar dan dicabar tubuh parti baru. Barangkali mereka saling menasihati, kita tidak tahu.

Yang kita tahu, DAP sebagai parti politik yang jelas tujuannya, akan sedia memberi ruang kepada sesiapa sahaja jika mau menuju destinasi yang satu - untuk mengheret Malaysian Official 1 ke muka pengadilan. Jalan perjuangan yang panjang ini tidak jauh beza dengan perlawan leluhur pra-Merdeka mencari jati diri bangsa dengan menolak jauh langkah jahat memecahkan masyarakat mengikut kaum dan kelas ekonomi.

Selamat menyambut bulan Merdeka, dan selamat Hari Malaysia.

Tangkap Malaysian Official 1.

RENDAHKAH MARTABAT FILEM BAHASA KEBANGSAAN?

Oleh NAZRUL NAZIR

*Penulis adalah alumni Sekolah Demokrasi

Dalam sebuah pertandingan larian, dengan lima orang peserta, tiga daripadanya sempurna tubuh badan, namun dua orang lagi mempunyai kecacatan. Bagi menjadikan pertandingan ini adil, peserta yang cacat itu perlu diberi keistimewaan supaya ia boleh setanding dengan peserta lain yang sempurna, samada dua peserta itu perlu diletakkan di depan, atau dibuatkan satu kategori dan anugerah baru iaitu Juara Kategori Sempurna dan Juara Kategori Orang Kelainan Upaya. Ini bagi memastikan kekurangan yang dimiliki dua peserta tadi tidak menjadi sebab kekalahan mereka dan mewujudkan keadilan dalam permainan.

Konsep ini telah diterangkan oleh Almarhum Tun Dr Ismail ketika mengulas mengenai hak dan keistimewaan orang Melayu, yang dicatat dalam memoir kisah hidupnya berjudul The Reluctant Politician: Tun Dr Ismail pada halaman 217. Beliau menggambarkan hak dan keistimewaan yang diterima orang Melayu dan Bumiputera dalam Perlumbagaan sebagai suatu handicap atau tahap kemahiran dalam permainan golf, supaya orang yang tahap permainannya rendah dapat berada di posisi yang membolehkan dia bermain dengan mereka yang berada di tahap yang lebih tinggi dan adil.

Keistimewaan ini juga disebut oleh Tun Dr Ismail sebagai satu penghinaan sebenarnya kepada kebolehan orang Melayu dan hanya boleh digunakan untuk jangka masa sementara supaya mereka dapat bersaing dan meningkatkan kemahiran mereka, dan berdiri setanding dengan bangsa lain. Ia bukanlah untuk mereka mengekalkan keistimewaan ini selamanya, tetapi supaya dengan keistimewaan ini mereka dapat menambah baik kehidupan mereka sehingga mampu setaraf dengan bangsa lain. Ini diulas dalam buku berjudul Drifting into Politics, The Unfinished Memoirs of Tun Dr Ismail Abd Rahman pada halaman 57.

Cubaan mewujudkan dua kategori Filem Terbaik dalam Festival Filem Malaysia (FFM), iaitu kategori Anugerah Filem Terbaik Bukan Bahasa Malaysia dan Anugerah Filem Terbaik sebenarnya bolehlah diklasifikasikan sebagai satu kaedah yang sama digunakan dalam pertandingan larian tadi, dan kaedah handicap seperti yang

digambarkan Tun Dr Ismail mengenai hak dan keistimewaan Melayu dan Bumiputera.

Bermula dengan polemik yang dicetuskan apabila filem Sepet arahan Yasmin Ahmad, yang memenangi Anugerah Filem Terbaik FFM ke-18 dipertikaikan kemenangannya kerana tidak menggunakan bahasa Melayu sepenuhnya, malah mencampur adukkan pelbagai bahasa termasuk bahasa Cina dan bahasa Inggeris, kemudian pada FFM ke-27 Persatuan Penerbit Filem Malaysia (PFM) memperkenalkan pula pengasingan dua kategori dalam FFM, iaitu Filem Terbaik dan Filem Terbaik Bukan Bahasa Malaysia.

Konsep dua kategori ini diteruskan

Malaysia terpaksa berusaha lebih keras, mencurahkan segala idea dan kreativiti dalam filem mereka, kerana mereka tahu padang yang mereka bermain tidak sama rata. Oleh itu tidak hairanlah kebanyakan filem yang bukan berbahasa Malaysia ternyata mempunyai mutu yang lebih baik dan berkualiti serta banyak menempah nama di persada antarabangsa. Filem The Journey, Jagat dan Ola Bola yang bukan berbahasa Malaysia ternyata jauh lebih hebat meninggalkan filem-filem berbahasa Malaysia seperti Mat Moto dan Polis Evo, namun mereka tetap tidak dapat diiktiraf sebagai Filem Terbaik Malaysia atas pengklasifikasi yang tidak adil oleh PFM.

Ironinya, dalam alasan mempertahankan identiti bahasa kebangsaan, kesemua filem yang dicalonkan dalam Anugerah Filem Terbaik Bahasa Malaysia tidaklah menggunakan bahasa Malaysia baku. Filem Polis Evo, Nota, Munafik, Jejak Warriors dan Mat Moto masih mengandungi bahasa rojak dan bahasa pasar dalam skrip filem, malah ada diantara penggunaan istilah bahasa yang disebut

tidak tepat sama sekali dan salah dari segi tatabahasa. Inilah masalah sebenar yang merendahkan martabat bahasa kebangsaan.

Sekiranya PFM benar-benar ingin mempertahankan bahasa kebangsaan, perkenalkan kategori Skrip Filem Bahasa Kebangsaan Terbaik, atau jadikan unsur Bahasa sebagai pemberat dalam pemarkahan filem terbaik. Maka, pengarah dan penerbit filem berbahasa Malaysia akan lebih menekankan aspek penggunaan bahasa kebangsaan dengan baku dan betul dalam pembikinan filem. Ternyata ia lebih berkesan dalam mempertahankan identiti bahasa kebangsaan.

Saya yakin bahawa filem berbahasa Malaysia kita sudah boleh berdiri sama tinggi dan duduk sama rendah dengan filem bukan berbahasa Malaysia. Jangan dihin dan direndahkan martabat filem bahasa kebangsaan kita dengan mengasingkan ia. Beri peluang mereka bersaing dengan filem lain.

Persaingan ini akan membina percambahan idea dan kreativiti mereka serta membuka peluang kepada mereka melakukan penambahbaikan. Bahasa Melayu pernah menjadi lingua franca suatu ketika dahulu, dan ditutur hingga ke Asia Barat dan Eropah. Adakah hanya kerana bahasa Cina dan India yang juga merupakan bahasa identiti kaum di Malaysia boleh memberi saingan hebat maka terpaksa asingkan kategori demi mempertahankan identiti bahasa Melayu?

Ironinya, dalam alasan mempertahankan identiti bahasa kebangsaan, kesemua filem yang dicalonkan dalam Anugerah Filem Terbaik Bahasa Malaysia tidaklah menggunakan bahasa Malaysia baku.

Skandal Mega 1MDB wajar diteliti Suruhanjaya Siasatan Diraja Antarabangsa



Sebuah mesyuarat Parlimen khas perlu diadakan bagi menubuhkan Suruhanjaya Siasatan Diraja Antarabangsa berhubung skandal RM55 bilion 1MDB dan ‘derma’ RM4.2 bilion melibatkan Perdana Menteri, Datuk Seri Najib Razak.

Ahli Parlimen Gelang Patah, Lim Kit Siang berkata tindakan itu penting bagi membersihkan kembali nama Malaysia dan mendapatkan kembali penghormatan sebagai sebuah negara berintegriti di kalangan masyarakat antarabangsa.

Jelasnya, amat memalukan bagi rakyat Malaysia apabila Amerika Syarikat harus campur tangan bagi membongkar penyelewengan melibatkan syarikat kerajaan seperti 1MDB.

“Bayangkan, rakyat Malaysia yang mempunyai maruah dan berbangga dengan negara terpaksa mendengar Peguam Negara Amerika, Loretta E. Lynch memberitahu kita bahawa dana negara telah dicuri dan diseleweng untuk kepentingan beberapa pegawai dan kroni.

“Kerajaan pula memberi respons yang sangat lemah apabila mengatakan akan bekerjasama dengan sebarang penyiasatan 1MDB, namun enggan mendedahkan apa-apa mengenai skandal itu kepada rakyat.

“Malah, laporan Ketua Audit Negara berhubung 1MDB sehingga ke hari ini masih diklasifikasi di bawah Akta Rahsia Rasmi,” katanya dalam sidang media di ibu pejabat DAP.

Ketua Parlimen DAP itu berkata demikian susulan tuntutan saman sivil oleh Jabatan Kehakiman Syarikat bagi merampas aset yang berkait dengan 1MDB selepas ia terbukti digunakan bagi tujuan rasuah dan penyelewengan.

Malah, tuntutan berkenaan turut mendedahkan bahawa sebanyak AS\$681 juta daripada jualan bon pada 2013 oleh syarikat milik Kementerian Kewangan itu telah dipindahkan ke dalam akaun Ambank individu yang dinamakan sebagai “Malaysian Official 1.”

Jumlah tersebut bertepatan dengan jumlah RM2.6 bilion yang dimasukkan ke dalam akaun peribadi Najib yang juga Penasihat 1MDB.

Tindakan undang-undang buktikan para pengkritik benar

Bagi Kit Siang, tindakan saranan civil Jabatan Kehakiman Amerika membuktikan kebenaran dakwaan pihak pembangkang dan kumpulan yang mahu Datuk Seri Najib Razak berundur daripada tumpuk pemerintahan negara akibat skandal mega berkembar terbabit.

Sebelum ini, Ahli Parlimen Petaling Jaya Utara, Tony Pua; Rafizi Ramli (Pandan); Bekas Timbalan Perdana Menteri, Tan Sri Muhyiddin Yassin; Bekas Menteri Pembangunan Luar Bandar dan Tempatan, Datuk Seri Shafie Apdal; Bekas Menteri Besar Kedah, Datuk Mukhriz Mahathir dan Bekas Perdana Menteri, Tun Dr. Mahathir Mohamed antara pemimpin yang lantang mengkritik skandal syarikat milik penuh Kementerian Kewangan itu.

“Ia juga membuktikan bahawa bekas pemimpin UMNO, Datuk Seri Khairuddin Abu Hassan adalah betul dan bersifat patriot apabila beliau sendiri membuat lawatan ke seluruh negara untuk meminta supaya siasatan segera dilakukan terhadap skandal 1MDB,” kata Kit Siang.

Tindakan undang-undang tersebut merupakan kes sitaan

terbesar yang pernah dibawa oleh Kleptocracy Asset Recovery Initiative, dalam sejarah Jabatan Kehakiman Amerika.

Tuntutan Mahkamah itu menamakan anak tiri Najib, Riza Aziz, Ahli Perniagaan, Jho Low dan dua pegawai kerajaan Abu Dhabi, Khadem Abdulla Al-Qubaisi

Bagi Kit Siang, tindakan saranan civil Jabatan Kehakiman Amerika membuktikan kebenaran dakwaan pihak pembangkang dan kumpulan yang mahu Datuk Seri Najib Razak berundur daripada tumpuk pemerintahan negara akibat skandal mega berkembar terbabit.

dan Mohammed Ahmed Badawy Al-Husseiny.

Antara aset yang bakal disita oleh kerajaan AS adalah termasuk hartanah mewah di New York dan California, lukisan oleh Vincent Van Gogh dan Claude Monet dan sebuah jet.

Berpuluh-puluh juta dolar Amerika yang telah digunakan untuk menghasilkan filem “The Wolf of Wall Street” yang

didakwa daripada dana 1MDB juga termasuk dalam tuntutan mahkamah untuk sitaan itu. Filem itu dihasilkan oleh syarikat milik Riza, Red Granite Picture.

Syarikat yang diasaskan dan ditubuhkan oleh 1MDB pada 2009 itu juga sedang disiasat oleh sekurang-kurangnya enam buah negara iaitu termasuk Amerika Syarikat, Singapura dan Switzerland.

Siapa pun ‘Malaysian Official 1’, kerajaan Malaysia mesti bertanggungjawab – Dr Aziz Bari

Pakar perlumbaan Dr Abdul Aziz Bari, berkata kerajaan tidak perlu berdolak-dalik terhadap pendedahan Jabatan Kehakiman Amerika Syarikat, sebaliknya mesti bertanggungjawab kerana 1MDB adalah syarikat kerajaan Malaysia.

Ini katanya termasuklah melalui campur tangan Yang di-Pertuan Agong.

Tindakan kerajaan yang disifatkannya sebagai cubaan ‘mengawal kerosakan’ itu bagaimanapun tidak menjadikan kerajaan dilihat bersih sebaliknya seolah-olah mengesahkan segala pendedahan yang dibuat pelbagai pihak termasuk parti-parti pembangkang, portal Sarawak Report dan blog-blog politik sebelum ini.

“Siapapun Malaysian Official 1 itu, 1MDB tetap milik kerajaan Malaysia. Kerajaan kena bertanggungjawab, kena jawab, dan yang akhirnya pada saya, Yang Di Pertuan Agong kena ambil tindakan. Jangan beri amaran lagi, perlu desak Najib buat tindakan yang sepatutnya,”

tegasnya ketika dihubungi Roketkini.

Menurut Ahli Jawatankuasa DAP Selangor itu, pendedahan Jabatan Kehakiman Amerika Syarikat yang telah memalukan imej negara tersebut sekaligus menunjukkan agensi-agensi kerajaan berkaitan yang terlibat dalam penyiasatan kes 1MDB seolah-olah tidak berkelayakan atau bersekongkol dengan Najib.

“Maknanya seolah-olah agensi kita seperti polis kita, penyiasat, Peguam Negara kita, sama ada lemah atau tak berkelayakan atau tak bekerja atau bersekongkol dengan Najib,” ujar beliau.

“Ini sudah sampai ke tahap kritis, kalau kerajaan tak buat apa-apa, dia boleh tenggelam, dan siapa yang bersama dia baik Peguam Negara, baik polis, mungkin akan tenggelam bersama. Kita tak mahu negara kita tenggelam bersama dia.

“Dia nak tenggelam tak apa. Tapi rakyat tak nak tenggelam dengan dia,” tegas Aziz.

Dana 1MDB terlibat bayar hutang judi di Las Vegas

Oleh Hafiz Zainuddin

Jabatan Kehakiman Amerika Syarikat (DOJ) mendedahkan, sebanyak AS\$1 bilion dana 1MDB telah digunakan untuk membayar hutang judi di Las Vegas, selain kapal layar mewah, perhiasan dalam, hartanah dan sebuah jet.

Pendedahan yang dibuat Timbalan Pengarah Biro Penyiasatan Persekutuan, Andrew McCabe bakal memberi tumparan hebat kepada kerajaan BN pimpinan Perdana Menteri Datuk Seri Najib Razak yang sebelum ini bermati-matian menafikan dana syarikat terbabit kononnya tidak diseleweng.

Berikut itu, Jabatan Kehakiman Amerika telah mengumumkan akan bertindak dengan memfailkan permohonan menyita dan merampas aset berkenaan.

Menyifatkan pendedahan ini menjatuhkan imej dan memalukan negara, Ahli Parlimen Raub Datuk Mohd Ariff Sabri berkata 1MDB yang sepatutnya menjaga amanah yang diberikan oleh rakyat kepada kerajaan telah dijadikan alat semata-mata untuk memperkayakan diri sendiri.

Tambah memalukan lagi kata beliau, pemimpin-pemimpin UMNO dan mereka yang mengaku ‘pejuang Melayu dan Islam’ amat sibuk dengan isu kafir harbi, konsert dan seumpamanya tetapi membutakan mata dengan penyelewengan rasuah terbesar yang dilakukan pemimpin.

“Malaysia ialah sebuah negara Islam yang ada belasan mufti, ribuan Qadhi, jutaan ustaz yang sibuk mengkafir-harbikan orang lain tapi tutup kedua mata, bila orang Islam sendiri mencuri dan rasuah.

“Pemimpin kita rasuah dan kita lihat sebahagian orang Melayu jerit sana sini mereka Islam dan mahu mempertahankan Islam sampai ketisian darah terakhir.

“Tetapi mereka masih tidak mahu menolak pemimpin yang rasuah dan mencuri duit rakyat Malaysia. Perbuatan dan pendirian demikian amat memalukan. Jika kita tidak bangkit menolak pemimpin yang korap, maka itu hipokrit dan kufur!” katanya.

Menurutnya adalah amat ironi, sebagai negara bukan Islam, Amerika bertegas dengan tidak membenarkan sistem kewangan dan perbankan

mereka dijadikan alat kepada ketua-ketua negara mencuri wang rakyat di negara mereka.

“Saya melihat ini sebagai kutukan ke atas Malaysia. Malaysia ialah negara ‘si pencuri’. Malaysia adalah sebuah negara yang rasuah dan mengamalkan budaya rasuah dan mencuri. Amerika yang membenci rasuah dan pencuri yang menyauk duit rakyat mereka sendiri ialah negara ‘kafir’,” katanya.

Dalam perkara yang sama Ariff berkata persoalan yang timbul saat ini ialah bagaimana pentadbiran Najib mempertahankan dirinya sendiri.

“Adakah mereka akan guna taktik lama dengan menipu rakyat Malaysia khususnya orang Melayu bahawa ini semata-mata sebuah konspirasi jahat dengan Jabatan Kehakiman Amerika dikuasai Yahudi?

“Pada masa yang sama menuduh Yahudi memang bengang dengan Najib yang dianggap penjaga dan pembela aqidah Ahlus Sunnah Wal Jamaah, pelopor wasathiyah dan pengajur maqasid syar’iah?” soal Ariff.

Beranikah Arul Kanda mengaku 1MDB memang mangsa penipuan

Adakah pihak 1Malaysia Development Berhad (1MDB) bersedia untuk akhirnya mengakui bahawa syarikat milik penuh kerajaan Barisan Nasional itu telah menjadi sebahagian daripada mangsa penipuan berbilion dolar AS di peringkat antarabangsa.

Setiausaha Publisiti DAP Kebangsaan, Tony Pua berkata, saman sivil yang dikemukakan Jabatan Kehakiman Amerika Syarikat Jumaat lalu untuk merampas aset bernilai hampir AS\$1 bilion itu turut disertai dengan dokumen yang mendedahkan kesemua transaksi haram terbabit.

Oleh itu, menurutnya, 1MDB yang diuruskan Arul Kanda tidak harus memberikan alasan bahawa syarikat terbabit “bukanlah pihak yang dinamakan dalam saman sivil terbabit, tidak mempunyai aset di Amerika Syarikat, malah tidak memperoleh faedah daripada pelbagai transaksi seperti yang dinyatakan dalam saman berkenaan”.

“Atau adakah Arul Kanda dan pasukannya masih tidak sedar bahawa berbilion dolar telah hilang (dari kantung 1MDB)? Mengapalah begitu sukar untuk eksekutif yang bijak pandai ini untuk memikirkan jika wang itu telah hilang atau sebaliknya?” Soal Tony Pua mengenai perkara itu dalam satu kenyataan.

“Atau, lebih masuk akal, Arul Kanda dan pasukannya adalah konspirator yang bersubahat di dalam seluruh penipuan. Adakah dia melakukannya untuk menutup penipuan yang melibatkan Perdana Menteri Malaysia sendiri yang didakwa telah menggelapkan lebih daripada AS\$700 juta ke dalam akaun peribadinya?” soalnya lagi.

Sebelum ini, Tony Pua yang juga Ahli Parlimen Petaling Jaya Utara mendakwa bahawa dokumen mahkamah AS itu menunjukkan terdapat tiga transaksi pembayaran telah dibuat ke atas akaun peribadi Najib, dengan jumlah terbanyak iaitu AS\$681 juta telah dipindahkan antara 21 hingga 25 Mac 2013, sejurus sebelum Pilihanraya Umum ke-13.

Malah, beliau turut menjelaskan terdapat dua bayaran lain berjumlah AS\$50 juta ke dalam akaun Najib sebelum ini, iaitu pemindahan sebanyak AS\$20 juta antara 23 Feb hingga 13 Jun 2011, dan AS\$30 juta antara bulan Mei hingga Disember 2012.

Sehubungan itu, Tony menggesa supaya Pengerusi Lembaga Pengarah 1MDB, Tan Sri Irwan Serigar menjaga kepentingan pembayar cukai di negara ini dengan mengambil tindakan segera memecat kesemua pegawai tinggi 1MDB bagi memastikan kejadian seumpama itu tidak berulang lagi.

“Irwan juga harus menyatakan secara terbuka, jika 1MDB sebenarnya telah menjadi mangsa penipuan dan mencari jalan supaya hasil yang dicuri disalurkan semula kepada negara,” katanya.

Jika itu juga gagal dilaksanakan Pengerusi syarikat terbabit, menurut Tony Pua, Irwan sendiri harus meletakkan jawatannya.

Saman sivil Jabatan Kehakiman Amerika berdasarkan kesalahan jenayah 1MDB



Biarpun Perdana Menteri, Datuk Seri Najib Razak cuba berdolak-dalik dengan mengatakan laporan Jabatan Kehakiman Amerika Syarikat (DOJ) mengenai 1MDB adalah tindakan sivil semata-mata, ia tetap berkait dengan perbuatan jenayah.

Ahli Parlimen Bukit Mertajam, Steven Sim berkata walaupun istilah ‘sivil’ digunakan, sejumblah 17 aset yang disebut di dalam dokumen itu disita kerana melibatkan penyelewengan dan salah laku melibatkan 1MDB dan wang rakyat Malaysia.

Secara lebih jelas, katanya, ia bermaksud jenayah telah dilakukan oleh pihak-pihak tertentu sehingga DOJ bertindak demikian.

Dokumen saman sivil DOJ yang difaikan minggu lalu itu menamakan anak tiri Najib, Riza Aziz, ahli perniagaan Low Taek Jho dan dua bekas pegawai Abu Dhabi sebagai antara pemain utama dalam dakwaan penyelewengan dana yang merupakan satu jenayah di Amerika Syarikat.

“DOJ akan mengambil tindakan sivil apabila melibatkan kes-kes di mana sabitan jenayah tidak boleh dilakukan, seperti apabila harta itu dipegang oleh pelarian, individu yang sudah mati atau individu yang tidak

dapat didakwa di Amerika Syarikat.

“Satu lagi sebab yang mungkin lebih relevan dengan kes 1MDB ialah tindakan sivil diambil terhadap pesalah yang kebal terhadap pendakwaan jenayah, atau pesalah yang terlalu berkuasa sehingga pendakwaan jenayah seolah-olah mustahil,” ujarnya.

Menurut Steven, ia disebutkan secara jelas di dalam buku panduan oleh Jabatan Negara Amerika Syarikat bertajuk ‘Recovery Asset US Tools & Procedures : A Practical Guide for International Cooperation’ yang diterbitkan pada tahun 2012.

Beliau menambah, kes mahkamah yang difaikan oleh DOJ itu dengan jelas menyatakan bahawa jenayah telah dilakukan berhubung syarikat milik Kementerian Kewangan,

1MDB.

Katanya, perenggan lima di dalam dokumen DOJ itu menyebut, “ini merupakan satu tindakan sivil in rem untuk menyita aset yang terlibat dengan konspirasi antarabangsa mengenai penyelewengan oleh 1Malaysia Development Berhad (1MDB).”

Steven menjelaskan, perenggan itu juga menyatakan bahawa “ia adalah harta yang terlibat dalam satu atau lebih kesalahan pengubahan wang haram”, yang merupakan kesalahan jenayah dalam undang-undang Amerika Syarikat.

Oleh itu, beliau berkata, Peguam Negara, Tan Sri Mohamed Apandi Ali perlu melihat perkara ini dengan serius dan tidak lagi terus memberi alasan lemah bagi mempertahankan individu yang tidak lagi boleh dipertahankan.

“Kesan tuntutan mahkamah oleh DOJ ini besar, malah menunjukkan bahawa pegawai-pegawai negara termasuk Malaysian Official 1 telah sesuka hati melakukan jenayah penyelewengan.

“Jika Peguam Negara tidak berbuat apa-apa, ia menunjukkan beliau bukan sahaja lemah tetapi turut bersubahat dengan penjenayah,” tegasnya.

Akaun palsu #RespectMyPM bukti Najib terdesak raih sokongan



Oleh Fatih Hassan Nordin

Kerajaan UMNO-BN yang ditadbir Datuk Seri Najib Razak seolah-olah kemaruk sokongan sehingga sanggup menggunakan gambar individu yang telah meninggal dunia untuk mencipta akaun laman

sosial palsu bagi mengampu Perdana Menteri itu.

Kegiatan tida k bertanggungjawab berkenaan didebakkan portal berita tempatan yang mendakwa akaun Facebook tersebut digunakan untuk menulis kemaskini memuji pentadbiran Menteri Kewangan terbabit dengan hashtag #RespectMyPM #BelieveinPM.

Penolong Setiausaha Wanita DAP Kebangsaan, Young Syefura berkata, tindakan seumpama itu tidak harus dipandang remeh kerana adalah menyalahi undang-undang sekiranya didapati ada pihak yang melakukan

pencurian identiti untuk tujuan-tujuan tertentu.

"Malah, dari segi politiknya, ini adalah usaha terdesak Najib yang didakwa ramai pihak sebagai 'Malaysian Official 1' untuk menunjukkan kepada rakyat Malaysia bahawa beliau masih lagi disokong."

"Kempen dan modus operandi seperti ini hanyalah untuk mengaburi kita dan masyarakat dunia semata-mata," katanya.

Hashtag berbaur sokongan terhadap Najib itu timbul selepas Jabatan Kehakiman Amerika Syarikat mengeluarkan tuntutan mahkamah terhadap 1MDB

ekoran penyelewengan dana. "Malaysia Official 1" antara individu yang terlibat dan dipercayai merujuk kepada Najib.

Dalam pada itu, Rara yang juga Ahli Jawatankuasa DAP Selangor berkata jika benar sokongan terhadap Najib begitu kuat, satu referendum nasional harus diadakan bagi membolehkan rakyat menzahirkan sokongan mereka.

"Jika tidak, ia hanya membuktikan bahawa sokongan yang ditunjukkan melalui akaun-akaun palsu berkenaan hanyalah propaganda murahan UMNO-BN untuk meraih sokongan terdesak," katanya.

Pemuda Umno sepatutnya minta Najib nafikan beliau 'Malaysian Official 1'

Pemuda UMNO sepatutnya mendesak Datuk Seri Najib Razak menafikan dakwaan bahawa beliau adalah "Malaysian Official 1" seperti yang dinyatakan dalam tuntutan mahkamah Amerika Syarikat terhadap 1MDB jika benar-benar mahu membersihkan nama perdana menteri itu.

Gesaan itu disuarakan Sosialis Muda DAP (DAPSY) susulan laporan polis yang dibuat Naib Ketua Pemuda UMNO, Khairul Azwan Harun terhadap bekas ketua-ketua agensi kerajaan atas dakwaan cubaan untuk menggulingkan Najib dan kerajaan.

Ketua DAPSY, Wong Kah Woh dalam satu kenyataan mempersoalkan tindakan itu yang didakwa seolah-olah menggertak individu yang mengambil langkah untuk membongkar skandal yang terjadi di negara ini.

Beliau yang juga Adun Canning menyifatkan ia sebagai kegagalan Pemuda UMNO dalam memahami kehendak rakyat khususnya golongan muda yang mahukan kebenaran ditegakkan berhubung dakwaan pihak berkuasa Amerika itu.

Justeru, katanya, Pemuda UMNO tidak berminat untuk merungkai skandal yang melibatkan 1MDB sebaliknya mahu mempertahankan Najib semata-mata.

"Pemuda UMNO jelas gagal untuk memahami apa yang diperlukan oleh rakyat dan golongan muda dalam keadaan begini. Seluruh negara ingin tahu kebenaran di sebalik pendedahan Jabatan Kehakiman Amerika Syarikat.

"Rakyat benar-benar ingin mengesahkan identiti 'Malaysia Official 1' yang telah menjarah kekayaan negara ini," katanya sambil menggesa supaya Pemuda UMNO mendesak Najib menafikan dakwaan terbabit.

Dalam laporan polis yang dibuat Khairul Azwan Harun 26 Julai lalu, beliau mendakwa Tan Sri Abdul Gani Patail (bekas Peguam Negara), Tan Sri Zeti Akhtar Aziz (bekas Gabenor Bank Negara) dan Tan Sri Abu Kassim Mohamed (bekas Ketua Pesuruhjaya SPRM) kononnya terlibat dalam komplot menjatuhkan Perdana Menteri, Datuk Seri Mohd Najib Razak.

Bagaimanapun, Ketua Polis Negara Tan Sri Khalid Abu Bakar kemudiannya menutup siasatan terhadap laporan itu setelah pihak polis mendapati ianya berdasarkan andaian semata-mata.

Bagi peguam yang juga aktivis DAP, Zulhazmi Shariff pengumuman Ketua Polis Negara itu amat mengejutkan kerana Khairul Azwan dalam perenggan akhir laporannya dengan jelas menyebut bahawa ia 'bukanlah dakwaan semata-mata tanpa asas'.

"Bila ia berkata demikian dan Ketua Polis pula berkata ianya tidak berasas, sepatutnya ia disiasat kerana laporan polis Khairul Azwan tanpa bukti adalah jelas memfitnah penama yang dinamakan," kata Zulhazmi kepada wartawan setelah membuat laporan polis ke atas laporan palsu Pemuda UMNO tersebut.

Kenyataan tidak berasas tersebut jelasnya telah menimbulkan kecurigaan, hilang keyakinan dan prejudis masyarakat terhadap agensi-agensi awam negara dan sistem keadilan negara.

"Ia jelas meletakkan Suruhanjaya Pencegahan Rasuah Malaysia (SPRM), Jabatan Peguam Negara dan Bank Negara di dalam konflik, memalukan dan jijik kerana tiga penama yang disebut dalam laporan polis Khairul Azwan adalah bekas pegawai tertinggi agensi-agensi berkaitan," jelas beliau.

Bertahun jadi 'boneka' 1MDB, firma audit Deloitte tarik diri

1MDB nampaknya telah mempergunakan Deloitte Malaysia dan mencemarkan reputasi firma audit antarabangsa itu semata-mata untuk memberi kredibiliti terhadap syarikat milik Kementerian Kewangan berkenaan.

Ahli Parlimen Petaling Jaya Utara, Tony Pua berkata Deloitte telah membantu 1MDB menutup penyelewengan bernilai berbilion ringgit sejak beberapa tahun lalu sehingga Jabatan Kehakiman Amerika Syarikat (DOJ) mendedahkannya dalam saman sivilnya.

"Bukti oleh DOJ jelas menunjukkan Deloitte telah membuat 'huru-hara' dalam audit 1MDB bagi dua tahun kewangan. Juruaudit telah dipergunakan oleh eksekutif 1MDB yang berulang kali menggelapkan berbilion ringgit dari syarikat tersebut.

"Mereka terpedaya dengan dokumen-dokumen palsu dan penipuan menyakinkan yang dibuat oleh pengurusan 1MDB," katanya dalam satu kenyataan.

Tony berkata demikian sebagai mengulas kenyataan 1MDB bahawa penyata kewangan syarikat itu bagi tahun 2013 dan 2014 yang diaudit sebelum ini tidak lagi boleh digunakan sehingga dakwaan yang dibuat DOJ ditentukan di mahkamah.

1MDB juga sedang mencari juruaudit baru bagi menggantikan Deloitte yang menyatakan akan menarik diri dari terus menjadi juruaudit syarikat berkenaan pada 26 Februari lalu seperti dilapor

media.

Menurut Tony yang juga Setiausaha Publisiti DAP, dengan pendedahan DOJ, Deloitte telah sampai ke tahap tidak lagi dapat mempertahankan penyata kewangan yang diauditnya bagi tahun 2013 dan 2014.

Oleh itu, jelasnya, 1MDB telah dipaksa membuat pengumuman yang disifatkannya sebagai 'ganjal' kerana terpaksa menafikan kebenaran laporan kewangannya sendiri.

"Pada asasnya, Deloitte sedang menarik diri dari terus terlibat dalam penyelewengan 1MDB. Lembaga Pengarah 1MDB yang baru pula tetap berkeras menyatakan tidak ada kesalahan yang dilakukan oleh syarikat berkenaan," katanya.

Tony turut menyifatkan Lembaga Pengarah 1MDB yang baru telah gagal ujian pertama integriti dan akauntabiliti apabila terus mendakwa penyata kewangan bagi tahun-tahun sebelum ini menunjukkan gambaran sebenar hal ehwal syarikat itu.

"Walaupun bukti kukuh telah didebakkan secara terbuka, Lembaga Pengarah baru yang diketuai oleh Ketua Setiausaha Perbendaharaan Negara, Tan Sri Irwan Serigar tetap cuba menutup jenayah besar-besaran yang berlaku dalam 1MDB.

"Ia kini menunjukkan Tan Sri Irwan Serigar hanya berminat untuk meneruskan tugas 'cemerlang' Lembaga Pengarah 1MDB sebelum ini yang meletak jawatan pada April lalu," ujarnya.

AL-KISAH MELAYU DAN DAP

Oleh ZAIRIL KHIR JOHARI

*Penulis adalah Ahli Parlimen Bukit Bendera

Sudah menjadi kebiasaan acapkali DAP diuar-uarkan sebagai parti orang Cina yang hanya menjaga kepentingan orang Cina, malah juga anti kepada orang Melayu dan Islam.

Walaupun segala tuduhan sedemikian lazimnya dibuktikan salah di mahkamah, dan sejumlah ganti rugi yang besar sudah pun dikutip daripada sekalian pemfitnah – biasanya Utusan Malaysia dan angkatan yang sewaktu dengannya, toh mahan yang sama masih lagi diulangi bagi perakam pita yang dipasang pada “loop.”

Barangkali pemerintah mengambil iktibar daripada ketua propaganda Nazi, Joseph Goebbels, yang mengutarakan pendapat bahawa “sesuatu pembohongan yang besar itu jika diulangi tanpa henti, lama-lama ia akan dipercayai.”

Hakikatnya, DAP tidak pernah anti kepada mana-mana kaum atau agama. Malah, perilaku sebegitu bercanggah dengan sanubari parti yang ditubuhkan pada tahun 1966 atas dasar “prinsip kesaksamaan kaum, keadilan sosial dan ekonomi, serta berteraskan institusi demokrasi berparlimen,” sepertimana yang tertera dalam Deklarasi Setapak pada tahun 1967.

Hakikatnya, sepanjang sejarah parti, DAP dibuktikan hanya anti kepada ketidakadilan, kezaliman, penyelewengan dan rasuah – tanpa mengira kaum atau agama pelaku. Apa tidaknya, apabila pemimpin tertinggi DAP sendiri pernah dipenjarakan kerana mempertahankan martabat seorang gadis melayu yang diperkosa.

DAP diasas dan diperjuangkan oleh semua kaum termasuk Melayu

Sebenarnya penglibatan Melayu dalam DAP telah bermula sedari awal penubuhannya pada tahun 1966. Jawatankuasa Tertinggi Pusat (CEC) pertama DAP, umpamanya, diwakili dua orang Melayu daripada 14 orang ahli, iaitu Daing Ibrahim Othman dan Mohd Nor Jetty. Sehingga kini, masih terdapat pemimpin Melayu dalam badan induk parti, bersama dengan kaum-kaum lain.

Lebih penting lagi, DAP juga secara konsisten memberi peluang kepada pemimpin Melayu dalam parti. Pada tahun 1967, setahun selepas

penubuhan parti, Daing Ibrahim telah dipilih untuk bertanding dalam pilihan raya kecil bagi kerusi Dewan Undangan Negeri (DUN) Tampoi di Johor.

Pilihan raya umum yang berlangsung pada tahun 1969 pula menyaksikan pencalonan sembilan ahli Melayu yang bertanding di satu kerusi Parlimen dan sembilan kerusi DUN. Akhirnya, dua daripada mereka berjaya menang, iaitu Ibrahim Singgeh bagi DUN Tapah Road di Perak dan Hassan Ahmad bagi DUN Si Rusa di Negeri Sembilan.

Pada pilihan raya umum seterusnya pada tahun 1974, DAP telah meletakkan calon Melayu di 38 daripada 160 kerusi Parlimen dan DUN yang ditandingi. Sekali lagi, dua kemenangan telah dicatatkan, kali ini dalam DUN Perak dengan Daing Ibrahim di DUN Pasir Putih dan Mohd Salleh Nakhoda Itam di Guntong.

Didorong oleh kejayaan dua calon Melayu serta kemenangan sejumlah 10 kerusi di DUN Perak, DAP mengatur langkah untuk percubaan berani di Perak pada pilihan raya umum 1978 dengan meletakkan 41 calon DUN di negeri tersebut, di mana 25 daripadanya merupakan orang Melayu. Secara keseluruhan, hampir satu pertiga atau 57 daripada 180 kerusi Parlimen dan DUN telah dipertandingkan oleh calon Melayu DAP. Namun begitu, hanya seorang sahaja yang berjaya, iaitu Salleh Nakhoda yang mempertahankan kerusi Guntong.

Pada tahun 1982, DAP meletakkan 25 calon Melayu dalam pilihan raya umum yang telah menyaksikan kemenangan Mohd Fadzlan Yahaya di DUN Pasir Bedamar, Perak. Fadzlan kemudian menjadi wakil rakyat Melayu DAP yang paling lama berkhidmat apabila berjaya menang dalam dua pilihan raya umum seterusnya pada tahun 1986 dan 1990.

Dalam pilihan raya umum 1990, DAP juga mencatat kemenangan calon Melayu yang paling ramai dalam sejarahnya, iaitu tiga orang termasuk Ahli Parlimen Melayu pertama, Ahmad Nor di kerusi Bayan Baru, Pulau Pinang. Selain Ahmad Nor, calon Melayu lain yang berjaya adalah Mohd Asri Othman bagi DUN Dermawan di Perak dan Fadzlan Yahaya yang kali ini bertanding di kerusi DUN Lahat, Perak.

Pada masa kini, DAP bukan sahaja memiliki pemimpin Melayu dalam badan tertinggi, iaitu CEC, malah buat kali pertama dalam sejarah



**Pada masa kini,
DAP bukan sahaja
memiliki pemimpin
Melayu dalam
badan tertinggi,
iaitu CEC, malah
buat kali pertama
dalam sejarah
parti terdapat
wakil Melayu di
setiap peringkat
legislatif negara.**

bukanlah berdasarkan warna kulit atau kepentingan peribadi tetapi kebolehan dan kemampuan untuk melaksanakan amanah. Atas sikap inilah DAP kini berjaya menarik bukan sahaja ramai anak muda, malahan tokoh-tokoh besar negara seperti Sasterawan Negara Dato' A Samad Said, pakar perlumbagaan Dr Abdul Aziz Bari dan beberapa lagi cendekiawan dan ahli akademik Melayu untuk menyertai parti.

Mengapa DAP dijadikan momok Melayu

Walaupun jelas DAP tidak pernah meminggirkan kepentingan mana-mana kaum, namun pemerintah sejak sekian lama mahu memaparkan imej DAP sebagai momok kepada orang Melayu.

Sebagai parti pembangkang tunggal dengan kebanyakan wakil rakyat dari kaum Cina, ditambah pula dengan dasar parti yang mendukung prinsip kemajmukan kaum dan agama yang bertentangan dengan teras perkauman pemerintah, DAP menjadi sasaran mudah bagi jentera media kerajaan Umno-Barisan Nasional.

Sejak dari itu, timbullah pelbagai label yang diberi kepada DAP, termasuk parti komunis, parti Kristian, ejen Singapura atau cauvinis Cina. Padahal, tidak satu pun tuduhan tersebut pernah dibuktikan. Jelas, ia cuma propaganda untuk membentuk citra DAP sebagai momok yang bertentangan dengan sanubari Melayu.

Agenda pemerintah ini sebenarnya merupakan sebahagian daripada usaha untuk menakut-nakutkan orang Melayu agar senantiasa terperangkap



dalam minda terkepung, seolah-olah ada sahaja musuh yang ingin menindas dan merampas hak Melayu. Keadaan ini pula akan meningkatkan ketakutan orang Melayu yang terpaksa bergantung kepada "pelindung," yakni Umno, untuk menjaga kepentingan mereka.

Dalam erti kata lain, selagi kekhawatiran Melayu berterusan, selagi itulah Umno akan kekal relevan. Bak kata presiden Umno, Dato' Sri Najib Razak, "Tiada Umno berkuasa terbangsatlah bangsa Melayu di bumi ini."

Kenyataan yang dibuat oleh presiden Umno ini sebenarnya amat bebal, kerana sekiranya benar orang Melayu ditindas dan dipinggir di negara ini, maka secara logiknya Umno sendiri yang sepatutnya bertanggungjawab kerana menguasai tumpuk pentadbiran sejak kemerdekaan.

Malah, adalah Umno sendiri yang menyebabkan kerugian besar harta negara melalui penyelewengan dan pengkhianatan seperti yang berlaku dalam skandal Bank Bumiputera pada awal tahun 1980an, skandal Forex Bank Negara pada awal tahun 1990an, sehingga ke skandal terbaru dan terbesar dalam sejarah Malaysia, iaitu syarikat 1MDB yang sudah melenyapkan puluhan bilion ringgit.

Ironinya, masyarakat Melayu terus dikaburkan mata walaupun mereka sebenarnya tidak mempunyai apa-apa untuk dikhawatirkan kerana hampir kesemua institusi-institusi negara dikawal oleh orang Melayu, termasuk perkhidmatan awam, badan perundangan, badan kehakiman, polis dan tentera. Dalam ekonomi pula, kebanyakan ekuiti saham dan industri-

industri utama seperti kesihatan, perbankan, komoditi dan lain-lain lagi dikawal oleh syarikat-syarikat berkaitan kerajaan (GLC) yang dipimpin Melayu.

Sebetulnya, orang Melayu patut takut dengan Umno kerana menipu dan merompak harta negara atas nama perjuangan Melayu. Namun, DAP yang tidak pernah menindas mana-mana kaum pula menjadi mangsa.

DAP sentiasa akan mendukung kedudukan Islam sebagai agama rasmi Persekutuan Malaysia

DAP tidak pernah memusuhi mana-mana agama, termasuk agama Islam. Adalah mustahil untuk sebuah parti politik sah di negara ini bersikap anti kepada agama atau kaum tertentu, apakah lagi parti pembangkang. Pastinya, jika DAP benar-benar bersifat anti-Melayu dan Islam, maka sudah lama DAP diharamkan.

Bagi memperjelaskan pendirian parti mengenai isu-isu yang berkait dengan sentimen kenegaraan, Persidangan Kebangsaan DAP pada tahun 2012 telah membuat pengisytiharan secara sebulat suara melalui Deklarasi Shah Alam. Antara komitmen yang dibuat termasuk:

1. Mempertahankan sistem Demokrasi Berparlimen dan Raja Berperlembagaan dengan Seri Paduka Baginda Yang di-Pertuan Agong sebagai Ketua Negara. DAP komited untuk menjunjung Perlembagaan Persekutuan Malaysia sebagai undang-undang yang paling agung negara dan meluhurkaninya dalam semangat Merdeka 1957 dan Perjanjian Malaysia 1963.
2. Memelihara kedudukan is-

Sebetulnya, orang Melayu patut takut dengan Umno kerana menipu dan merompak harta negara atas nama perjuangan Melayu. Namun, DAP yang tidak pernah menindas mana-mana kaum pula menjadi mangsa.

timewa orang Melayu dan Bumiputra serta hak-hak kaum-kaum lain, seperti yang termaktub dalam Artikel 153 Perlembagaan Persekutuan.

3. Memastikan kedudukan Islam sebagai agama Persekutuan serta kebebasan untuk mengamalkan agama-agama lain dengan aman dan damai, seperti yang termaktub dalam Artikel 3 dan 11 Perlembagaan Persekutuan.
4. Memartabatkan Bahasa Melayu sebagai Bahasa Kebangsaan seperti yang termaktub dalam Artikel 152 Perlembagaan Persekutuan, serta menggalakkan penggunaan dan pengajian bahasa-bahasa ibunda lain untuk membentuk masyarakat yang cemerlang dan berbilang bahasa.

Jelas, pendirian DAP ini bukan sekadar omong-omong kosong, apabila ia diterjemahkan ke dalam bentuk dasar apabila DAP bersama rakan-rakan gabungan lain berjaya membentuk kerajaan negeri di Pulau Pinang.

Satu contoh yang nyata adalah peruntukan yang diluluskan bagi hal ehwal Islam, yang bukan sahaja telah meningkat tetapi telah dilipat gandakan sejak zaman sebelumnya dari RM25.58 juta pada tahun 2008 kepada RM56.53 juta pada tahun 2016.

Selain daripada kenaikan umum bagi hal ehwal Islam, tanah bernilai hampir RM80 juta telah disumbangkan oleh kerajaan negeri untuk pembinaan kompleks mahkamah syariah setinggi tujuh tingkat. Pada masa yang sama, kerajaan juga telah menyediakan tanah untuk pembangunan zon industri halal, mengembangkan tanah untuk perkuburan Islam, meningkatkan eluan bulanan pegawai masjid sebanyak 80 peratus, dan menyumbang lebih daripada RM500,000 setahun sebagai bonus untuk guru sekolah agama.

Hal yang lebih penting adalah hakikat bahawa kerajaan negeri buat kali pertama memulakan peruntukan tahunan untuk semua sekolah bantuan, termasuk sekolah jenis kebangsaan Cina dan Tamil, dan juga sekolah agama. Pada tahun 2015, sebanyak 176 institusi pendidikan Islam menerima

peruntukan berjumlah RM1.75 juta daripada kerajaan negeri.


Pada tahap cendekia, kerajaan negeri Pulau Pinang juga menggerakkan wacana Islam melalui badan pemikir Penang Institute. Dengan kerjasama gerakan masyarakat sivil, Penang Institute telah memulakan siri syarahan dan perbincangan meja bulat yang menampilkan tokoh cendekiawan Islam seperti Tariq Ramadan dari Universiti Oxford, penulis Turki Mustafa Akyol dan ahli akademik yang lain seperti Ebrahim Moosa dari Notre Dame University, Abdullahi Ahmed An-Na'im dari Emory University, Syed Farid al-Attas dari National University of Singapore dan pengkaji-pengkaji Islam seperti James Piscatori dari Universiti Durham. Motif di sebalik perbincangan ini adalah untuk menggalakkan idea Islam yang terkait dengan tema seperti tadbir urus baik, demokrasi, liberalisme, sekularisme dan hak asasi manusia.

Dari segi parti pula, DAP juga telah mula mendekati perkembangan dunia Islam. Pada tahun 2015, Ketua Parlimen DAP Lim Kit Siang telah mengetuai delegasi Ahli Parlimen DAP dalam dua lawatan berasingan ke Jordan dan Mesir pada bulan April diikuti dengan Tunisia dan Turki pada bulan Oktober. Melalui lawatan ini, pemimpin DAP telah bertemu dan bertukar pendapat dengan pemimpin Islam utama seperti mantan Presiden Turki Abdullah Gü'l, Presiden Parti Ennahdah Tunisia Rached Ghannouchi, Setiausaha Agung Ikhwan Muslimun Mesir yang kini hidup dalam buangan, Mahmoud Hussein, mantan Timbalan Perdana Menteri Mesir Ziad Bahaa-Eldin, serta ramai lagi termasuk Ahli-ahli Parlimen negara-negara tersebut. Usaha ini bertujuan untuk mengamati contoh-contoh amalan terbaik berkenaan isu-isu perundangan, tadbir urus dan perhubungan antara kaum dan agama dalam negara-negara Islam.

Propaganda pemerintah selama 50 tahun sememangnya telah berjaya menanamkan perasaan kemusykilan dan salah faham masyarakat Melayu terhadap DAP. Walaupun tuduhan-tuduhan liar yang sering dilemparkan terhadap DAP berupa tohmah dan fitnah semata-mata, malah dibuktikan salah di mahkamah, namun ia masih lagi diulangi sehingga DAP dianggap sebagai musuh utama orang Melayu.

Namun, hakikatnya jauh berbeza. Meskipun keahlian parti kebanyakannya terdiri daripada bukan Melayu, DAP tidak mengambil pendekatan perkauman dalam dasar-dasar parti. Sebaliknya, DAP adalah parti berbilang kaum yang memberi peluang kepada semua, termasuk kepimpinan Melayu sejak dari penubuhan parti. Hakikatnya, Umno dan Barisan Nasional yang sebenarnya menggadai masa depan negara apabila gagal mengurus negara dengan baik sehingga berlaku perbalahan perkauman dan agama serta skandal-skandal penyelewengan yang amat merugikan negara.

Apakah pun cabaran yang dihadapi, DAP akan terus berjuang demi merealisasikan impian untuk negara Malaysia yang sejahtera dan harmoni untuk semua rakyat Malaysia, tidak mengira kaum atau agama.



AHMAD NOR: TOKOH PEKERJA, SUARA PELBAGAI KAUM

Oleh WAN HAMIDI HAMID

Sempena bulan Merdeka dan sambutan Hari Malaysia, The Rocket edisi Bahasa Malaysia mengimbas kembali ketokohan pemimpin DAP, Saudara Ahmad Nor untuk menjadi ikutan anak muda generasi akan datang.

Era pentadbiran Mahathir yang bermula pada awal 1980-an membawa perubahan kepada dimensi sosial, ekonomi, dan tentunya politik Malaysia. Sama ada buruk atau baik, masalah segregasi kaum dan agama, masalah rasuah dan penyelewengan, masalah salah guna kuasa dan ketirisan wang awam, dan pelbagai isu yang dialami saat ini; kebanyakannya bermula dari era Dr Mahathir Mohamad menjadi Perdana Menteri pada 1981.

Era beliau juga membawakan pertembungan di antara tuntutan pekerja dan kehendak majikan, di mana kerajaan sepatutnya menjadi orang tengah. Era 1980-an dan 1990-an menyaksikan pertikaian dan pertentangan tersebut yang juga merupakan kesinambungan daripada perjuangan golongan pekerja sejak awal abad ke-20. Dan boleh juga dianggap sebagai berakhirnya era kekuatan golongan pekerja di Malaysia.

Sepanjang era itu, salah satu nama besarnya yang sering menjadi tatapan di dada akhbar adalah Ahmad Nor yang terkenal sebagai Presiden Cuepacs, sebuah pertubuhan yang merupakan gabungan kesatuan-kesatuan sekerja dalam perkhidmatan awam. Selain itu beliau juga merupakan tokoh MTUC, sebuah gabungan kesatuan-kesatuan sekerja awam dan swasta, sekaligus menjadikannya suara utama pekerja Malaysia.

Anak Kedah yang dilahirkan di Alor Star pada 1943 di zaman pendudukan Jepun dalam Perang Dunia Kedua ini muncul sebagai pejuang hak pekerja pada zaman dewasanya, terutama sepanjang era pentadbiran Mahathir.

Sebagai wartawan muda pada awal 1990-an, saya sempat bertemu dengan beliau sebagai pemimpin kesatuan sekerja. Sesekali selepas sidang media, kami berbual-bual, walaupun dalam masa

Sepanjang pekhidmatannya sebagai Ahli Parlimen, beliau banyak membangkitkan isu-isu hak pekerja di samping menuntut pendedahan tentang anak-anak syarikat serta agensi kerajaan yang bertanggungjawab dengan usaha membangunkan rakyat, termasuk orang Melayu.

yang singkat, tentang kedudukan kesatuan yang sentiasa dihimpit majikan dengan “restu” kerajaan.

Terjun ke arena politik

Menyedari bahawa aktiviti kesatuan sekerja sahaja tidak cukup untuk menjamin masa depan pekerja, Ahmad Nor merasakan peranannya akan lebih berkesan jika beliau berkecimpung dalam dunia politik. Kerana baginya, politik mampu membawa pemimpin ke Parlimen serta Dewan Undangan Negeri di mana ruang tersebut boleh disuarakan hak pekerja, malah mengemukakan usul serta rang undang-undang bagi pihak pekerja. Selain itu, wakil rakyat juga mampu menentang mana-mana rang undang-undang yang menindas atau menafikan hak pekerja.

Dengan itu, beliau memilih jalan politik untuk meluaskan ruang buat pekerja bersuara. Beliau tidak memilih UMNO atau mana-mana parti komponen Barisan Nasional. Pendiriannya jelas; perjuangan pelbagai kaum. Pada 1986 beliau menyertai parti kecil pembangkang, Socialist Democratic Party (SDP) – yang merupakan serpihan DAP (Democratic Action Party) - tetapi tidak lama kerana menyedari DAP lebih kental dalam menghadapi Barisan Nasional. Dalam percubaan pertamanya dalam politik kepartian, beliau tewas dalam pertandingan lima penjuru bagi kawasan Dewan Undangan Negeri Kelana Jaya (Selangor) dan tiga penjuru bagi kawasan Parlimen Lembah Pantai dalam pilihan raya umum 1986.

Lim Kit Siang yang menyedari semangat kepelbagaian kaum Ahmad Nor telah berjaya mengajak tokoh kesatuan sekerja itu untuk menyertai DAP selepas

PRU 1986. Dalam pilihan raya kecil Parlimen Gopeng di Perak pada 16 Mei 1987, Ahmad Nor diletakkan oleh DAP untuk bertanding melawan Dr Ting Chew Peh yang merupakan Timbalan Setiausaha Agung MCA. Pilihan raya kecil itu diadakan selepas perletakan jawatan Presiden MCA pada masa itu, Tan Koon Swan, yang terlibat dalam Skandal Pan-Electric Industries. Dalam percubaan itu, Ahmad tewas walaupun mendapat undi yang memberangsangkan, iaitu 8,096 berbanding 12,619 yang diperolehi calon BN.

Namun, kekalahan itu tidak menghalang beliau daripada terus bergerak aktif dalam politik serta gerakan pekerja. Walaupun tidak lagi memegang jawatan dalam kesatuan perkhidmatan awam, undang-undang membenarkan beliau aktif sebagai wakil MTUC.

Mencatat sejarah



Pada pilihan raya umum 1990, beliau bertanding di kawasan Parlimen Bayan Baru di Pulau Pinang. Beliau menang setelah menewaskan orang kuat Gerakan, Khor Gark Kim, dengan majoriti 2,340 undi, dalam persaingan satu-lawan-satu yang sengit. Kerusi itu asalnya disandang oleh DAP melalui Peter Dason yang memenanginya dengan majoriti kecil 262 undi sahaja dalam PRU 1986.

Beliau sekali gus mencatatkan sejarah sebagai Ahli Parlimen DAP yang pertama daripada kalangan orang Melayu. Sebelum ini DAP hanya mempunyai wakil-wakil rakyat Melayu yang bertaraf Ahli Dewan Undangan Negeri seperti Fadzlan Yahya dan Ibrahim Singgeh, kedua-duanya di Perak.

Sepanjang pekhidmatannya sebagai Ahli Parlimen, beliau banyak membangkitkan isu-isu hak pekerja di samping menuntut pendedahan tentang anak-anak syarikat serta agensi kerajaan yang bertanggungjawab dengan usaha membangunkan rakyat, termasuk orang Melayu. Kelantangannya di Parlimen adalah kesinambungan suaranya membela pekerja sejak era kepimpinannya dalam kesatuan sekerja lebih sedekad yang awal. Sama seperti rakan seperjuangannya dalam gerakan pekerja dan DAP, V. David, beliau tidak pernah melupakan tapak asas politiknya – suara pekerja.

Duri dan api perjuangan

Namun, angin politik pertengahan dekad 1990-an berubah lagi apabila dasar kapitalisme kroni Mahathir berjaya meningkatkan kemajuan ekonomi negara – walaupun kesan ekonomi buih, iaitu kemakmuran palsu, akan terdedah pada akhir-akhir 1997. Dalam pilihan raya umum 1995, DAP mengalami kekalahan kerana pengundi memilih “pembangunan” dengan kembali mengundi BN. Ahmad Nor turut kecundang dalam usahanya mempertahankan kerusi Parlimen Bayan Baru. Walaupun mendapat 25,351 undi, lawannya daripada BN menang dengan majoriti lebih 6,000 undi.

PRU 1999 sepertutnya menjadi pencetus kebangkitan rakyat, khususnya selepas Datuk Seri Anwar Ibrahim, dipecat dan dipenjarakan oleh kerajaan BN pimpinan Dr Mahathir pada akhir 1998. Semangat Reformasi yang turut membawa kepada persefahaman antara pembangkang di mana buat kali pertama DAP dapat duduk bersama dengan PAS dalam satu gabungan Barisan Alternatif.

Namun, penguasaan serta manipulasi media oleh BN berjaya menakutkan sebahagian besar pengundi, khususnya kaum Cina, apabila TV dan akhbar tidak

Baginya, politik mampu membawa pemimpin ke Parlimen serta Dewan Undangan Negeri di mana ruang tersebut boleh disuarakan hak pekerja, malah mengemukakan usul serta rang undang-undang bagi pihak pekerja.

henti-henti memaparkan imej “ganas” kebangkitan rakyat Indonesia melawan pemerintahan diktator Suharto. Imej-imej di mana orang Cina dipukul dan dibunuh serta bangunan-bangunan dibakar di Indonesia berjaya menakutkan pengundi Cina di Malaysia, manakala pola pengundian orang Melayu pula berpecah di antara penyokong Anwar dan Mahathir; sementara pengundi Sabah dan Sarawak kekal sebagai deposit tetap BN.

Dengan itu, DAP sekali lagi menanggung kesan propaganda kental BN sehingga menyebabkan Lim Kit Siang dan Karpal Singh hilang kerusi Parlimen mereka. Dalam PRU 1999 itu, DAP hanya menang 10 daripada keseluruhan 193 kerusi Parlimen. Ahmad Nor yang berpindah kerusi ke Selangor turut terkesan dengan fenomena tersebut apabila usahanya untuk memenangi kerusi DUN Damansara Utama telah gagal.

Sekali lagi, kegagalan itu tidak menghalangnya untuk terus berkhidmat, selaras dengan kedudukannya sebagai salah seorang pemimpin parti di peringkat kebangsaan. Namun begitu, keadaan kesihatan beliau turut tidak mengizinkan tokoh berjiwa muhibah ini untuk bergiat aktif.

Pada 11 Februari 2003, Ahmad Nor yang berusia 60 tahun ketika itu meninggal dunia di Hospital Besar Kuala Lumpur kerana menghidap kanser paru-paru. Allahyarham dikebumikan di tempat lahirnya di Alor Star, Kedah. Beliau meninggalkan seorang isteri dan lima anak serta beberapa cucu.



Legenda seorang tokoh

Dalam ucapan takziahnya, Lim Kit Siang menyifatkan Allahyarham yang ketika itu masih memegang jawatan Naib Pengurus DAP Kebangsaan sebagai tokoh pekerja dan ahli politik yang hebat di mana negara telah kehilangan seorang anak Malaysia yang unggul. Beliau menyifatkan ketokohan Ahmad sebagai mendepani masa, melambangkan cita-cita Bangsa Malaysia lebih awal sebelum Mahathir membawa idea Wawasan 2020.

Dalam majlis peringatan untuk Allahyarham pada 18 Mac 2003, Kerk Kim Hock selaku Setiausaha Agung DAP pada masa itu menyatakan:

“Ahmad Nor memberi wajah Melayu dalam DAP. Selain menjadi pemimpin tertinggi Melayu dalam parti, beliau juga pemimpin Melayu pertama yang dipilih sebagai Ahli Parlimen. Ini adalah titik kejayaan yang dicatatkan dalam pilihan raya umum 1990 apabila beliau memenangi kerusi Parlimen Bayan Baru.

“Walaupun Ahmad Nor tidak sempat melihat impianya menjadi nyata – melihat sebuah Malaysia yang bersatu, progresif, saksama dan adil – pengorbanan beliau telah mengukuhkan atas perjuangan ke arah cita-cita tersebut. Hidupnya yang menjadi teladan akan menjadi sumber inspirasi kepada kita semua, khususnya generasi muda, untuk gigih berusaha mencapai Impian Malaysia.”

Sepanjang era pasca-1995, saya kadang-kadang bertemu Ahmad Nor selepas beliau meninggalkan dunia kesatuan sekerja untuk berkhidmat sepenuh masa sebagai ahli politik. Sebagai wartawan, satu kenangan yang sukar saya lupakan ialah apabila kami berdua berbual-bual selepas satu mesyuarat

Jawatankuasa Tertinggi Pusat (CEC) DAP yang pada masa itu diadakan di ibu pejabat parti di Petaling Jaya pada 1999; ia berkisar tentang isu Karpal Singh yang dilaporkan media sebagai menarik balik kata-katanya pada 1990 “Islamic state? Over my dead body” (Mahu tubuhkan negara Islam? Langkah mayat saya dahulu).

Apabila saya bertanya Ahmad tentang penarikan balik kata-kata itu dan apa yang dilaporkan media sebagai permohonan maaf Karpal, saya agak terkejut dengan jawapannya: “Saya pun terkejut juga. Karpal sepatutnya tidak menarik balik kata-katanya. Apa yang dikatakannya itu tidak salah”.

Malah, beliau menjelaskan kepada saya bahawa laporan media agak kurang tepat kerana Karpal hanya menjelaskan mengapa beliau berkata begitu pada 1990, dan kenyataan Karpal adalah mengikut Perlembagaan Persekutuan yang mengesahkan Malaysia bukan sebuah negara agama, Malaysia adalah sebuah negara sekular yang menerima Islam sebagai agama rasmi.

Malah, apabila pucuk pimpinan DAP membuat keputusan untuk tidak bersama dengan Barisan Alternatif kerana PAS berkeras mahu melaksanakan Negara Islam, Allahyarham turut menyokong, malah meluluskan usul tersebut dalam satu mesyuarat khas CEC pada September 2001.

Beliau berpegang kepada prinsip parti — berteraskan Perlembagaan Persekutuan — yang antara lain menyatakan:

- Usaha mana-mana parti komponen BA untuk menubuhkan negara agama, sama ada negara Islam, negara Buddhist atau negara Kristian, adalah bertentangan dengan Manifesto

BA, dan

- Walaupun PAS berhak atas prinsip negara Islam, hakikatnya ialah dalam sebuah negara yang majmuk, penubuhan negara Islam tidak sesuai dan tidak praktikal bagi Malaysia.

Itulah pendirian seorang tokoh – seorang Melayu Islam yang berjiwa Malaysia – yang menjunjung Perlembagaan Persekutuan sebagai undang-undang tertinggi di negara ini. Namun, kerana politik perkauman yang menjadi amalan UMNO-BN serta turut meresapi sesetengah kalangan pimpinan parti-parti lain, cita-cita Allahyarham untuk melihat Malaysia yang adil, saksama dan demokratik masih perlu terus diperjuangkan.

Penghormatan

Sebagai mengenang jasanya, kerajaan negeri Pulau Pinang pada November 2014 telah menamakan sebuah jalan di negeri itu sempena dengan nama beliau.

Sewaktu perasmian nama jalan tersebut, Ketua Menteri Lim Guan Eng menyatakan bahawa:

“(Ahmad Nor) sememangnya pemimpin yang berpandangan jauh, disukai ramai, serta pandai berkomunikasi dengan rakyat daripada pelbagai kaum. Bagi memperingati jasa dan khidmat Allahyarham kepada rakyat dan negara, Kerajaan Negeri dengan ini menamakan jalan sambungan baru dari Lebuhraya Tun Dr. Lim Chong Eu ke persimpangan Jalan Jelutong/ Jalan Perak/Jalan Tan Sri Teh Ewe Lim sebagai Jalan Ahmad Nor.”

Jalan itu dibina oleh IJM Corp Berhad dengan kos RM24 juta, dan turut menyediakan laluan khas pejalan kaki dan basikal.



DAP HORMATI MUAFAKAT PAKATAN HARAPAN



Oleh LIM GUAN ENG

*Penulis adalah Ketua Menteri Pulau Pinang, merangkap Setiausaha Agung DAP

DAP tidak akan meneruskan rancangan untuk membubarkan Dewan Undangan Negeri Pulau Pinang dan mengadakan pilihan raya negeri. Keputusan ini dibuat setelah melakukan perbincangan dengan pemimpin-pemimpin parti dan negeri Pulau Pinang selepas Timbalan Presiden PKR merangkap Menteri Besar, Datuk Seri Azmin Ali memberitahu saya semalam bahawa kepimpinan PKR tidak setuju dengan cadangan mengadakan pilihan raya awal.

Datuk Seri Azmin, Naib Presiden PKR Nurul Izzah dan Pengarah Pilihan Raya PKR, Saifudin Nasution telah berjumpa dengan saya dan Pengurus DAP negeri Chow Kon Yeow di Pulau Pinang pada 20.7.2016 untuk mendengar sebab-sebab kami mahu mengadakan pilihan raya negeri.

Kami telah menjelaskan bahawa ia merupakan strategi yang proaktif, bukan sahaja untuk membenarkan rakyat membuat keputusan sama ada saya perlu terus menjadi Ketua Menteri Pulau Pinang semasa didakwa dengan tuduhan rasuah yang direka-reka atau tidak, tetapi apa yang lebih penting adalah ‘memberi’ hukuman kepada apa yang didebak oleh Peguam Negara Amerika Syarikat semasa mengemukakan saman untuk merampas aset bernilai AS\$1 bilion yang dicuri oleh 1MDB dari rakyat Malaysia.

Tidak salah untuk mengembalikan mandat kepada rakyat kerana ia merupakan elemen terpenting dalam demokrasi. Untuk tidak berasa takut mengembalikan semula mandat kepada rakyat bagi membuat keputusan tentang pendedahan skandal 1MDB serta pemerintahan, kredibiliti dan kesahihan kerajaan negeri Pulau Pinang yang diketuai oleh saya, adalah strategi yang

DAP berpegang kepada proses rundingan secara kolektif. Walaupun dikritik secara tidak adil, kita akan berpegang kepada janji dan prinsip amanah sebagai asas menjalinkan hubungan lebih erat dalam Pakatan Harapan.

betul apabila BN menentang pilihan raya negeri ini diadakan. Tidak ada sebab untuk BN menentangnya apabila mereka membuat perkara yang sama di Kelantan, Sabah dan Sarawak.

Semasa pertemuan pada 20 Julai, keimbangan yang wajar tentang pilihan raya negeri itu telah dibangkitkan, bahawa PKR berisiko kehilangan lebih banyak kerusi berbanding DAP. Satu cadangan telah dibuat bahawa DAP memberi satu atau dua kerusi negeri yang sedia ada di Pulau Pinang kepada PKR agar cadangan mengadakan pilihan raya negeri itu lebih diterima oleh PKR. Walau bagaimanapun, kami diberitahu ia tidak dapat dilaksanakan.

Memandangkan PKR tidak bersetuju dengan cadangan tersebut, DAP tidak akan meneruskan hasratnya untuk mengadakan pilihan raya negeri. Walaupun Amanah bersetuju dengan DAP, kita telah mengumumkan bahawa DAP akan hanya membuat keputusan tersebut jika mendapat persetujuan bersama ketiga-tiga parti dalam Pakatan Harapan.

DAP berpegang kepada proses rundingan secara kolektif. Walaupun dikritik secara tidak adil, kita akan berpegang kepada janji dan prinsip amanah sebagai asas menjalinkan hubungan lebih erat dalam Pakatan Harapan. Tidak seperti BN yang kleptokrat, pemimpin-pemimpin DAP adalah demokrat yang berusaha untuk membina dan mengukuhkan kepercayaan bersama.

Pulau Pinang sebagai negeri keusahawanan dan berkebajikan

Pemimpin-pemimpin Pakatan Harapan kini harus memberi fokus dalam menjadikan Pulau Pinang sebagai model urus tadbir yang baik dan kepimpinan yang bersih untuk membangunkan Pulau Pinang agar menjadi sebuah negara keusahawanan dan berkebajikan. Ini berlawanan dengan kapitalisme kroni dan rasuah BN.

Walaupun tidak mempunyai sumber semula jadi dan ketandusan peruntukan dari Kerajaan Persekutuan, Pulau Pinang telah berjaya membangun dengan berbekalkan urus tadbir yang baik, membina bakat sumber manusia serta bergantung kepada sektor swasta dan masyarakat sivil dalam rangka kerja Kerjasama Awam-Swasta (PPP). Dengan kerajaan negeri memperuntukkan wang modal atau pembentukan penuh projek/inisiatif, kita mengalui alukan sektor swasta melaburkan dana atau kepakaran dalam pembangunan berterusan.

Walaupun dibiayai secara awam, banyak projek/inisiatif ini dijalankan oleh sektor swasta atau masyarakat sivil, dengan minimum atau tidak ada campur tangan dari kerajaan negeri. Projek Penang Science Cafe yang bernilai RM20 juta untuk memberi kelas percuma kepada kanak-kanak dalam sains aplikasi dan robotik, Tech Dome di Pulau Pinang yang bernilai

RM28 juta untuk meningkatkan minat dalam sains dan teknologi, skim Latihan Dual Vokasional German bernilai RM6 juta yang menawarkan kursus diploma lanjutan 42 bulan di mana para pelajar boleh mengetahui lebih lanjut tentang pekerjaan di kilang-kilang yang diiktiraf termasuk di German, perpustakaan digital Pulau Pinang bernilai RM3 juta yang baru, dan juga Festival George Town tahunan menunjukkan kejayaan model negeri keusahawanan Pulau Pinang.

Pulau Pinang juga merupakan negeri berkebajikan yang tidak mengabaikan masyarakat miskin dan tidak berasa baik. Sejak 2008, lebih RM400 juta telah diperuntukkan untuk sekolah, warga emas, bayi baru lahir, ibu tunggal, orang kurang upaya, suri rumah, pemandu teksi, nelayan, penarik beca, serta pelajar sekolah rendah, menengah dan universiti.

Kami memperuntukkan 12% dari bajet tahunan untuk pertolongan secara wang tunai, malah, menjamin pendapatan isi rumah bulanan minimum sebanyak RM790 dengan menambah pendapatan mereka yang kurang daripada RM790. Dalam erti kata lain, jika pendapatan isi rumah bulanan anda adalah RM600 sebulan, kerajaan akan membayar RM190 setiap bulan. Mungkin inilah sebab mengapa pekali Gini tentang ketidaksamaan pendapatan di Pulau Pinang telah berkang daripada 0.42 pada 2009 kepada 0.364 pada 2014, satu peningkatan lebih 13% dalam masa 5 tahun, jika dibandingkan dengan purata negara sebanyak 0.401.

Program perumahan awam dan berpatutan kita sebanyak 22,512 unit, telah menarik minat yang meluas seperti yang ditunjukkan oleh sambutan hangat orang ramai ke ekspo perumahan mampu milik di Prangin Mall sejak dua hari lalu.

Negeri keusahawanan dan berkebajikan hanya dapat dicapai kerana kita merekodkan lebihan bajet tahunan melalui pentadbiran bersih. Pentadbiran CAT Pulau Pinang dalam Keupayaan, Kebertanggungjawaban dan Ketulusan telah membenarkan rizab kita meningkat daripada RM850 juta kepada hampir RM1.6 bilion dalam 8 tahun. Hutang negeri Pulau Pinang telah dikurangkan sebanyak 90% kepada hanya RM69 juta - yang terendah di Malaysia. Malah, kadar pengangguran Pulau Pinang sebanyak 1.5% menawarkan pelbagai jenis peluang pekerjaan.

Lebih banyak usaha akar umbi perlu dibuat supaya rakyat dimaklumkan dengan dasar-dasar baik oleh kerajaan negeri Pulau Pinang yang bekerja keras untuk kepentingan rakyat dan bukan kroni. Hanya dengan cara itu kita akan yakin untuk menghadapi pilihan raya akan datang serta tidak takut kehilangan kerusi. Kita mesti menang bukan kerana kegagalan, salah guna kuasa dan rasuah oleh BN, tetapi disebabkan kekuatan kerja keras kita sendiri dalam mewujudkan sebuah negeri keusahawanan dan berkebajikan.

HARAPKAN PEGAR, PEGAR MAKAN PADI



Oleh TONY PUAH

*Penulis adalah Ahli Parlimen PJ Utara

Yang sebenar-benarnya anti-Melayu adalah pemimpin-pemimpin UMNO yang mencuri wang rakyat, bukannya DAP yang ingin supaya wang yang dirompak dipulangkan dan para perompak dipenjarakan.

Perdana Menteri Datuk Seri Najib Razak menyerang Parti Bersatu Malaysia (BERSATU) yang ditubuhkan Tun Dr Mahathir Mohamad dan Tan Sri Muhyiddin Yassin kerana bekerjasama dengan DAP yang dituduh sebagai anti-Melayu dan anti-Islam.

Nampaknya Dato' Seri Najib Razak akan terus menggunakan tuduhan-tuduhan liar yang berbaur perkauman untuk mengkaburkan krisis utama

yang melanda Malaysia hari ini iaitu skandal 1MDB. Sehingga hari ini, Dato Seri Najib tidak mampu memberikan sebarang bukti bahawa DAP telah menentang hak dan kepentingan orang Melayu.

Malah di bawah kepimpinan Setiausaha Agung Lim Guan Eng sebagai Ketua Menteri Pulau Pinang, kami telah membuktikan bahawa semua rakyat tanpa mengira bangsa telah dilayan secara adil dan saksama. Misalnya, kerajaan Pakatan di Pulau Pinang telah meningkatkan peruntukan tahunan untuk hal ehwal Islam daripada hanya RM13 juta di bawah Barisan Nasional pada 2008 sehingga melebihi RM50 juta hari ini.

Yang menjadi ironi, pemimpin-pemimpin MCA pula kini menyerang DAP kerana terlambau berat sebelah kepada masyarakat Melayu dan Islam.

Hakikatnya, pengkhianat Melayu yang paling besar ialah Datuk Seri Najib Razak dan UMNO kerana mereka

telah mengkhianati amanah yang telah diberikan oleh rakyat, terutamanya orang Melayu.

UMNO hari ini merupakan contoh peribahasa "harapkan pegar, pegar makan padi". Kerajaan BN yang diketuai oleh UMNO dan Perdana Menteri Dato Seri Najib telah menyalahgunakan kuasa mereka untuk memperkayakan saudara-mara, kroni-kroni dan diri mereka sendiri.

Sehingga hari ini, Dato Seri Najib Razak gagal menjelaskan sebab USD731 juta telah diselewengkan daripada 1MDB ke dalam akaun bank perbadinya. Perkara ini telah

dibongkarkan oleh pihak berkuasa Amerika Syarikat.

Selain itu, Peguam Negara Amerika Syarikat juga mendakwa rakyat Malaysia telah ditipu oleh pegawai-pegawai 1MDB dan pihak berkuasa di Malaysia sebanyak USD3.5 bilion. Antaranya, anak tiri Dato Seri Najib Razak, Riza Aziz telah menerima USD238 juta untuk

menerbitkan filem Hollywood, membeli rumah-rumah mewah di Los Angeles, New York dan London.

Yang paling memalukan Malaysia ialah bahawa beratus-ratus juta ringgit wang 1MDB telah digunakan untuk membayar hutang judi kroni Dato' Seri Najib, Jho Low dan Riza Aziz.

Kesemua perkara yang disebut di atas langsung tidak dinafikan oleh Dato Seri Najib yang juga merupakan Presiden UMNO.

DAP bersama-sama rakan-rakan seperjuangan yang lain telah bekerja berhempsah-pulas untuk membongkarkan dan menyebarkan skandal ini supaya rakyat akan mengenali wajah sebenar Dato' Seri Najib dan UMNO-Barisan Nasional.

Itulah sebabnya Dato' Seri Najib dan penyokong-penyokong beliau akan terus menyerang DAP sebagai parti anti-Melayu. Mereka akan terus mengkaburkan realiti untuk mempertobohkan rakyat, mempertahankan jawatan-jawatan mereka, terus menikmati rezeki haram yang telah diperolehi dan mengelak sebarang tindakan undang-undang terhadap mereka.

'DAP akan terus bekerjasama dengan mana-mana pihak yang mengutamakan perjuangan dasar melawan rasuah, menegakkan keadilan dan membina sebuah kerajaan yang cekap, akauntabel dan telus, termasuklah parti yang baru, Bersatu.'



Aktivis bersama penggiat seni hari ini berarak ke pejabat Suruhanjaya Hak Asasi Manusia (Suhakam) bagi membantah tindakan Dewan Bandaraya Kuala Lumpur (DBKL) merobohkan arca warisan negara, Puncak Purnama pada bulan lalu.

Kumpulan itu berarak sejauh kira-kira 250 meter pada pukul 2.10 petang tadi bermula dari pusat membeli-belah Sogo ke pejabat Suhakam untuk menghantar memorandum bantahan.

Turut kelihatan sepanduk karikatur Menteri Wilayah Persekutuan, Datuk Seri Tengku Adnan Tengku Mansor, susulan kenyataan beliau sebelum ini bahawa arca Puncak Purnama harus dirobohkan kerana ia "menyakitkan pandangan" sehingga dikecam keras penggiat-penggiat seni tanah air.



SEPI BULAN MERDEKA, OGOS TANPA SUARA

Oleh HAFIZ ZAINUDDIN

Kali terakhir saya pergi parti malam merdeka ialah tiga tahun lalu di sebuah pusat sosial bertempat sebelah Jalan Petaling melayan kesepian rakan-rakan, dan diri sendiri.

Tepat jam dua belas, kami melompat-lompat dan menari sambil bunyikan wisel dan menembak poppers yang entah siapa berikan. Esok pula hari cuti. Merdeka!

Tapi sudah tentu, parti menyambut malam merdeka dengan pembebasan negara dari penjajah jauh berbeza. Tak perlu dikisahkan di sini bagaimana Union Jack akhirnya diturunkan, dan bagaimana pahlawan nusa siap siaga mahu memerdekaan tanah air ini dengan api dan darah. Kita sudah tahu cerita itu seawal darjah enam lagi.

Kuala Lumpur tidak menipu. Tiap kali Ogos, DBKL akan pasang lampu aneka warna dengan deretan Jalur Gemilang di sepanjang jalan utama kota. Kita menyambut hari bersejarah ini dengan satu semangat; di atas rongga jantungmu, akan tertegak bertapak dalam, kebebasan, cinta antara kita wahyu dari Tuhan- Usman Awang 1956.

Tapi malang Merdeka Malaysia, 1 Ogos 2016 baru-baru ini kerajaan mengambil alih peranan kolonial dengan menguatkuasakan Akta Majlis Keselamatan Negara.

Maka, segala gema sorak-sorai gembira yang terakam dalam waktu di Stadium Merdeka 59 tahun lalu dihenyah hinjak, dengan undang-undang yang jauh lebih hina dari Akta Keselamatan Dalam Negeri (ISA).

Ironi! Bulan merdeka negara dan rakyat dihina dengan satu lagi belenggu baharu direncana elit politik negara.

Laungan keramat tujuh kali MERDEKA oleh Tunku Abdul Rahman semacam sudah tawar tiada makna.

Apa itu Akta Majlis Keselamatan Negara?

“Kebebasan rakyat untuk mendapatkan hak sivil mereka hanya terletak atas belas ihsan seorang Perdana Menteri – Najib Razak. Beliau boleh dengan sesuka-hati mengisyiharkan sebarang kawasan

menangkap; kuasa untuk memeriksa dan menyita; kuasa untuk menggeledah premis bagi benda berbahaya; kuasa untuk memeriksa orang bagi benda berbahaya dan kuasa untuk menyita kenderaan, vesel, pesawat udara atau pengangkut.

Benar, kerajaan melaksanakannya demi keselamatan negara yang tidak boleh dikompromi. Persoalan kini bukan terhadap kawalan keselamatan tetapi pemusatan kuasa kepada Perdana Menteri.

Ia, sudah tentu menjadi ancaman

beraja.

Bayangkan suatu ketika anda menjadi popular kerana disyaki mahu menjatuhkan kerajaan hanya gara-gara tersalah LIKE sebuah status subversif di Facebook. Pergerakan anda dikawal malah ditangkap, dan kawasan rumah anda juga dikawal geledah sita pihak berkuasa - ini mungkin sebuah andaian yang boleh berlaku.

Namun, yang lebih malang jika semua pengkritik kerajaan ‘didiamkan’ oleh si pelaku! Sebagaimana Ops Lalang yang memangsakan hampir semua pemimpin pembangkang ke dalam ISA. Saat itu, demokrasi mati. Saat itu juga mungkin tiada lagi orang, ahli politik atau pujangga boleh terlepas untuk melontar buah kritik mereka, dan di mana kita pada waktu itu?

Ogos 2016, merdeka-mu makin hilang suara, sepi mu kian dirasa. Selamat menyambut hari Merdeka ke-59.

Suka saya memutar semula sajak Sasterawan Negara Pak Samad Said yang mengajak kita bangkit melawan zalim pengusa.

Unggun Bersih

*Semakin lara kita didera bara—
kita laungkan juga pesan merdeka:
Demokrasi sebenderang mentari
sehasrat hajat semurni harga diri.*

*Lama resah kita—demokrasi luka;
lama duka kita—demokrasi lara.
Demokrasi yang angkuh, kita cemuh;
suara bebas yang utuh, kita idami!*

*Dua abad lalu Sam Adams berseru:
(di Boston dijirus teh ke laut biru):
Tak diperlu gempita sorak yang gebu,
diperlu hanya unggun api yang syahdu.*

*Kini menyalalah unggun sakti itu;
kini merebaklah nyala unggun itu.*

Dengan bidang kuasa MKN yang ‘meluas dan samar’, ia menjadikan Perdana Menteri berkuasa penuh terhadap badan-badan kerajaan termasuk semua kementerian dan agensi termasuk pasukan tentera dan polis.

sebagai “kawasan keselamatan” untuk tempoh enam bulan dan juga berkuasa untuk melanjutkan masanya,” kata satu kenyataan bersama Majlis Presiden Pakatan Harapan sejurus akta itu dikuatkuaskan.

Secara mudah, akta MKN membolehkan Perdana Menteri mengisyihar sesbuah ‘kawasan keselamatan’ - darurat, tanpa perlu melalui perkenan Duli Yang Maha Mulia Yang Di Pertuan Agong dan tidak perlu melalui Parlimen!

Akta ini antara lain memperuntukkan bidang kuasa khas melibatkan penahanan masuk dan pemindahan orang; perintah berkurung; kuasa untuk mengawal pergerakan jalan; kuasa

serius terhadap demokrasi dan sistem raja berperlembagaan negara ini kerana ia membolehkan Perdana Menteri menyingsirkan kuasa prerogatif Yang di-Pertuan Agong untuk mengisyiharkan darurat.

Dengan bidang kuasanya yang ‘meluas dan samar’, ia menjadikan Perdana Menteri berkuasa penuh terhadap badan-badan kerajaan termasuk semua kementerian dan agensi termasuk pasukan tentera dan polis.

Rata-rata pengkritik, ahli politik dan ahli akademik menganggap penguatkuasaan Akta MKN sebagai satu penderhakaan terhadap perlombagaan negara dan institusi

DAP gesa kerajaan prihatin kes rogol dan perkahwinan gadis bawah umur

DA P m e l a h i r k a n kebimbangannya berikutan keputusan mahkamah membebaskan seorang perogol gadis bawah umur daripada sebarang hukuman jenayah selepas didapati mangsa tersebut menarik semula aduannya.

Penolong Setiausaha Publisiti DAP Kebangsaan, Teo Nie Ching berkata, mangsa berusia 14 tahun itu tidak sepatutnya dibenarkan untuk membuat keputusan sendiri, sebaliknya Akta Kanak-kanak 2001 perlu dikuatkuasakan bagi melantik pelindung, seperti peruntukan Akta untuk menguruskan kes itu.

“Tidak patut benarkan mananya mangsa di bawah umur untuk menarik semula aduannya. Mangsa di bawah umur selalunya tidak tahu apa hak yang ada pada mereka dan tidak tahu keputusan yang paling baik untuk kepentingan mereka.

“Mereka boleh senang-senang terpengaruh dengan pihak ketiga, walaupun mereka sendiri tidak sedar bahawa keputusan orang ketiga itu akan mendatangkan akibat yang buruk” katanya dalam satu kenyataan, 4 Ogos lalu.

Sebelum ini, Reuters telah melaporkan bahawa seorang lelaki yang didakwa merogol gadis bawah umur setahun yang lalu telah dibebaskan daripada sebarang hukuman penjara selepas mengahwini mangsa. Mangsa kemudiannya turut menarik semula aduannya itu.

Merujuk kes tersebut, Nie Ching yang juga Ahli Parlimen Kulai berkata, adalah jelas bahawa dasar kerajaan untuk menangani perkahwinan bawah umur di negara ini “tidak berfungsi” di tahap yang diharapkan.

Malah, katanya, kes seumpama itu bukanlah kes pertama yang pernah direkodkan.

Pada 2013, katanya, seorang pengurus restoran berusia 40 tahun dari Sabah telah dibenarkan untuk berkahwin dengan mangsa rogolnya yang berusia 13 tahun, namun tertuduh tetap dikenakan hukuman penjara 12 tahun dan sebatan.

Justeru bagi mengelak perkara yang sama daripada terus menular, Nie Ching menggesa kerajaan supaya menggunakan pakai resolusi Bangsa-bangsa Bersatu yang telah diterima pada Oktober 2013 untuk menghapuskan perkahwinan kanak-kanak.

‘Gelombang Shafie’ mula lumpuhkan UMNO Sabah



Geolombang berterusan pembumbaran cawangan-cawangan UMNO di Sabah selepas Datuk Seri Shafie Apdal meletakkan jawatannya daripada parti tersebut dijangka bakal melakar sejarah perubahan buat negara.

Kehangatan suasana politik di negeri itu kian terasa setelah semakin ramai

ahli-ahli Umno dilaporkan meninggalkan parti tersebut dan menyatakan sokongan kepada Shafie yang lantang mengkritik Perdana Menteri Datuk Seri Najib Razak.

‘Gelombang Shafie’ itu turut memberi kesan kepada Ahli-ahli Dewan Undangan Negeri Sabah khususnya dari UMNO apabila Adun Sulabayan Datuk Jaujan Sambakong

meninggalkan parti lamanya dan kini duduk dalam blok pembangkang.

Pengarah Pilihanraya DAP Sabah Chan Foong Hin ketika dihubungi Roketkini, berkata kesudian Jaujan meninggalkan UMNO dan bersama pembangkang merupakan satu titik permulaan perubahan politik Sabah.

“Walaupun buat masa ini

beliau dan Datuk Seri Shafie Apdal tiada platform politik, namun mesej yang dibawa mereka kini cukup jelas, iaitu ‘Ubah Sabah,’” katanya.

Adun Sri Tanjong itu menjelaskan melalui program berterusan Shafie mengadakan jelajah menjelaskan isu-isu semasa kepada rakyat Sabah, ia akan mampu memberikan impak yang lebih tinggi kepada rakyat Sabah khususnya di kawasan-kawasan kubu kuat UMNO sebelum ini.

“Dalam pilihanraya umum lalu, pakatan pembangkang tidak dapat menembusi kubu kuat UMNO terutamanya di kawasan Pantai Timur Sabah dan kita cuma boleh menang satu DUN iaitu di Sri Tanjung dan satu lagi bagi Parlimen Sandakan.

“Kita perlukan agen perubahan yang membawa momentum baharu di kawasan-kawasan ini dan keberadaan gerakan Shafie melakukan jelajah memang tepat pada masanya,” ujar beliau.

Krisis air 8 tahun di negeri kelahiran Perdana Menteri, salah siapa?

Bayangkan jika anda terpaksa berhadapan dengan kekerapan gangguan bekalan air yang berlanjut selama lapan tahun, dan ada ketikanya pula bekalan air terputus sehingga berminggu-minggu lamanya.

Namun, inilah situasi yang terpaksa dihadapi ribuan penduduk sekitar daerah Temerloh dan Mentakab yang telah menjelaskan kehidupan sehari-hari mereka selama ini khususnya di waktu puncak dan musim perayaan.

Apa yang lebih mengecewakan, pihak Pengurusan Air Pahang Berhad (PAIP) hanya menyediakan sekitar 20 buah tangki statik sahaja sekitar Mentakab bagi menampung keperluan ribuan pengguna yang terjejas.

Di sebalik segala kelemahan menangani masalah ini, timbul satu lagi persoalan; mengapa peruntukan sebanyak RM1.9 bilion untuk menaik taraf sistem bekalan air negeri ini masih gagal menyelesaikan masalah tersebut.

Malah, kata Adun DAP Mentakab Tengku Zulpuri Shah, pihak berkuasa sebaliknya memberikan alasan-alasan yang tidak munasabah dengan mengaitkan beberapa faktor luaran sebagai sebab utama bekalan air terjejas.

Antara alasan yang diberikan

antaranya ialah akibat dari fenomena El Nino yang menyebabkan sungai ceteck selain kecurian kabel atau penggunaan paip lama.

“Alasan sebegini hanyalah untuk menutup kelemahan Kerajaan Negeri Pahang serta Pengurusan PAIP Pahang. Di sini juga kita boleh lihat ketidakcekapan dasar pembangunan dan infrastruktur Pahang kerana telah gagal menyelesaikan masalah atas rakyat.

“Ia membuktikan bahawa kerajaan Pahang tidak menjalankan tanggungjawab dengan sempurna,” katanya.

Menurut Tengku Zul, perkara ini telah pun diadukan sejak Disember 2013 lagi malah telah disuarakan dalam Dewan Undangan Negeri sebelum ini.

“Masalah dasar sungai ceteck, pembesaran loji dan pendalaman dasar sungai ini sudah saya adukan pada Disember 2013. Masalah ini berlaku sejak lama dahulu ketika Adun sebelum ini menjadi wakil rakyat,” jelas Tengku Zul.

Membangkitkan persoalan, Tengku Zul berkata jika projek menyedut pasir untuk jualan di Jerantut boleh dilaksanakan, mengapa projek mendalamkan dasar sungai di loji-loji

bermasalah tidak dilakukan.

Untuk menyelesaikan masalah yang telah berpanjangan ini, beliau berkata dasar dan konsep perancangan bandar yang baik perlulah diaplilikasikan secara menyeluruh bagi mengelakkan kejadian seperti ini berulang.

Justeru, beliau mencadangkan supaya pihak terbabit khususnya di peringkat Kerajaan Tempatan melantik wakil-wakil pembangkang untuk menganggotai Ahli Majlis Tempatan bagi memantau projek dan aktiviti jabatan-jabatan berkaitan.

“Keduanya saya cadangkan supaya dilantik Adun menjadi salah seorang ahli dalam pengurusan PAIP negeri.

“Dalam masa yang sama, pihak berkenaan perlu mencari sumber air yang lain bagi menyelesaikan kekurangan bekalan air pada masa yang sama menaiktaraf loji-loji rawatan air yang sering terganggu,” ujarnya.

Beliau berkata, krisis bekalan air yang melanda Mentakab dan beberapa kawasan sekitar ini akan terus dibangkitkan dalam Sidang DUN hadapan.

“Perdana Menteri juga perlulah prihatin terhadap masalah air yang sering berlaku di negeri kelahirannya sendiri,” tambah Tengku Zul lagi.

DI SEBALIK 1MDB, SKANDAL LAIN SEDANG BERLANGSUNG



Oleh ZAMZANI HUSIN

Sudah lebih seminggu butiran skandal 1MDB didedahkan Jabatan Kehakiman Amerika Syarikat. Dalam ayat Andrew McCabe yang merupakan Timbalan Pengarah FBI, menurutnya “rakyat Malaysia ditipu hidup-hidup”. Penipuan berskala antarabangsa yang melibatkan pelbagai syarikat itu dikaitkan dengan “Malaysian Official 1 (MO1)” dan rakan perniagaan malah ahli keluarganya.

Namun, sehingga kini Timbalan Perdana Menteri, Datuk Seri Zahid Hamidi terus membisu. Beberapa pimpinan UMNO sudah tampil menafikan bahawa MO1 adalah Najib. Dalam bahasa UMNO, tindakan itu ibarat penyataan kesetiaan terhadap Datuk Seri Najib Tun Razak.

Zahid mengambil pendekatan lebih tenang dengan berdiam diri. Tapi sikap itu tidak datang dari percubaan untuk menunjukkan karisma sebagai Pegawai Nombor Dua tertinggi kerajaan. Diam Zahid bukan kosong. Saat perhatian kita tertumpu kepada isu 1MDB dan watak-watak yang terlibat, perancangan halus untuk mengutip setiap sen daripada wang pembayar cukai di negara ini melalui agensi kerajaan sedang berlangsung. Kutipan itu tak lain bakal mengisi kantung syarikat yang dipercayai dikuasai atau mempunyai kepentingan dengan kroni Barisan Nasional.

Awal tahun ini, rakyat digemparkan dengan perancangan UMNO-BN untuk membawa masuk berjuta-juta

Menggantikan Najib Razak dengan Zahid Hamidi ibarat menggantikan tayar kereta yang bocor dengan tayar bocor yang sama. Kebocoran sistem Imigresen ketika Zahid selaku Menteri Dalam Negeri menyerupai skrip skandal rasuah 1MDB dengan Najib sebagai Menteri Kewangan.

warganegara Bangladesh kononnya demi memenuhi keperluan pelbagai sektor. Ramai pihak menyatakan bantahan. Meski Zahid kemudian telah menangguh pengambilan itu, tidak dapat tidak kita bertanya sektor apa yang dimaksudkan yang memerlukan begitu banyak tenaga pekerja asing ketika puluhan ribu warganegara kita sendiri terpaksa diberhentikan akibat nilai ringgit jatuh.

Ada suara-suara mendakwa bahwa ahli keluarga Zahid mempunyai kepentingan dalam syarikat yang akan mengendalikan kemasukan pekerja-pekerja asing berkenaan. Kalau benar, tak ada apa-apa yang menghairankan kerana Zahid cuma meniru skrip klasik pemimpin UMNO-BN.

Pemanipulasi Jabatan Imigresen sebagai agensi kerajaan oleh regim UMNO-BN tidak habis di situ. Pemberian kontrak sistem Imigresen dilakukan tanpa melalui tender terbuka kepada tujuh buah syarikat yang beberapa di antaranya dikenal pasti mempunyai rekod buruk dan

bermasalah.

MyEg misalnya yang dilantik pada Januari 2015 sebagai pengendali operator pembaharuan permit Pas Lawatan Pekerja Sementara (PLKS) telah didapati melanggar undang-undang apabila membenarkan pembaharuan hampir 9,000 pekerja asing. Jumlah itu hanya untuk 2013 dan 2014.

Kerajaan membelanjakan hampir RM10 bilion sejak pelantikan tujuh syarikat terbabit dari Januari tahun lalu sehingga April tahun ini bagi memastikan sistem Imigresen berjalan lancar. Namun, jumlah itu nampaknya tidak cukup untuk mengelakkan sistem Imigresen diceroboh sehingga menyaksikan ratusan ribu warga asing masuk ke negara ini tanpa rekod sah.

Tiada seorang pun pemimpin UMNO-BN yang tampil mengecam penyelewengan tersebut. Masing-masing berdiam diri juga periuk sendiri. Tidak Zahid sekalipun yang merupakan Menteri Dalam Negeri yang antara lain tugasnya memastikan kedaulatan negara

tidak diceroboh oleh musuh-musuh dari dalam. Sama ada skandal 1MDB yang dipalitkan pada Najib Razak sebagai MO1 bakal membuatkan Perdana Menteri itu melepaskan jawatan, susah untuk diteka. Najib seakan-akan kebal dari undang-undang setakat ini. Tapi jika beliau melepaskan jawatan, adakah kita rela pemimpin seperti Zahid Hamidi sebagai pengganti?

Menggantikan Najib Razak dengan Zahid Hamidi ibarat menggantikan tayar kereta yang bocor dengan tayar bocor yang sama. Negara akan terus diselubungi skandal rasuah para pemimpin UMNO BN dan seterusnya menuju negara gagal. Kebocoran sistem Imigresen ketika Zahid selaku Menteri Dalam Negeri menyerupai skrip skandal rasuah 1MDB dengan Najib sebagai Menteri Kewangan. Parti UMNO-BN tidak dapat diselamatkan lagi. Barah tamak dan pentingkan periuk nasi sendiri berbanding nasib rakyat sudah merebak di kalangan pemimpinnya.

Lagi malang buat rakyat Malaysia barangkali adalah apabila blok pembangkang masih belum dapat kata sepakat. Pendedahan butiran skandal 1MDB seharusnya dijadikan satu peluang untuk mengetepikan perbezaan dan mencapai satu persetujuan bersama bagi membina momentum untuk mengambil alih Putrajaya pada Pilihan Raya Umum akan datang. Rakyat sebagai pemberi mandat akan terus terpinggir akibat kekusutan yang melanda negara. Adakah rakyat Malaysia sudah sampai di tahap di mana hanya keajaiban dapat menyelamatkan nasib mereka daripada terus terpinggir akibat kemelut politik dalam negara yang tidak berkesudahan?



UMNO ITU PARTI POLITIK, BUKAN BANGSA MELAYU

Adakah orang Melayu mati jika UMNO ditolak?

Oleh DATO' MOHAMAD ARIFF
SABRI ABDUL AZIZ

*Penulis adalah Ahli Parlimen Raub dan Ahli Jawatankuasa DAP Pahang

Melayu itu lebih besar dari UMNO. UMNO hanya sebuah parti politik yang disokong oleh bahagian yang lebih kecil dari keseluruhan orang Melayu. UMNO patut menerima realiti ini.

RSN Rayer ialah seorang ADUN di Pulau Pinang untuk kawasan Sri Delima. Dalam tahun 2014, dia telah menyebut perkataan ‘celaka UMNO’ dalam dewan undangan negeri Pulau Pinang. Dia dihadapkan ke mahkamah atas pertuduhan menghasut dengan menuturkan istilah ‘UMNO celaka’.

Rayer telah dibebaskan dari pertuduhan tersebut tanpa perlu membela diri dalam mahkamah seterusnya.

Hakim memutuskan bahawa istilah ‘celaka UMNO’ bukanlah hasutan. UMNO bukannya bangsa tapi sebuah parti politik. Sama seperti parti lain yang dianggotai oleh bangsa-bangsa khusus tapi parti tersebut bukanlah bangsa itu sendiri.

Jadi kalau kita sebut ‘celaka UMNO’; ianya bukan menghasut. Kerana ia tidak bermakna Melayu celaka. DAP sebagai

Daripada 3.2 juta undi yang diperolehi oleh UMNO hanya 2.72 juta sahaja orang Melayu, jika jumlah pengundi Melayu ialah 7 juta orang, maka Melayu yang tidak undi UMNO adalah sebanyak lebih 4 juta orang.

contoh, selalu disebut sebagai DAPig, tapi jika orang UMNO sebut demikian, seperti yang mereka pekik selalu, itu bukanlah menghasut. Kerana yang disebut babi ialah DAP – parti politik, bukan bangsa Cina.

Kepada orang Melayu, signifikan keputusan mahkamah ialah UMNO itu ialah sebuah parti bukan bangsa. Maka apabila ada orang sana sini menjaya bahawa UMNO itu Melayu dan Melayu itu UMNO, itu suatu dusta.

“Celaka punya UMNO”

UMNO hanya ada ahli seramai 3.5 juta. Itu kata mereka. Di atas kertas mungkin ada 3.5 juta. Realitinya, ia lebih kurang dari itu. 3.5 juta disebut sebut hanya untuk buat show dan menakutkan orang lain.

Mungkin jumlah ahli sebenarnya tinggal 2.5 juta. Orang Melayu pula

ada 15 juta. Ertinya, hanya seorang dari lima orang Melayu ialah ahli UMNO. Maka bagaimana UMNO itu Melayu dan Melayu itu UMNO? Lebih ramai Melayu bukan ahli UMNO.

Demikian juga dalam PRU13 tahun 2013. UMNO memperolehi jumlah undi sebanyak 3.2 juta. Andaikan semua pengundi yang mengundi UMNO ialah Melayu. Jumlah pengundi Melayu yang keluar mengundi dalam PRU13 ialah hampir 7 juta orang. Jika UMNO dapat 3.2 juta undi dan semuanya Melayu pula, bererti 3.8 juta orang Melayu tidak mengundi UMNO.

Jadi bagaimana UMNO tanpa segan dan silu, mengatakan mereka mewakili Melayu? Lebih ramai orang Melayu mengundi parti bukan UMNO.

Tapi kita tahu, dari 3.2 juta yang mengundi UMNO, bukan semuanya Melayu. India pembodek dan Cina yang mahu kesenangan, ada juga mengundi

UMNO. Mungkin 15% daripada undi yang diperolehi oleh UMNO datang dari bangsa bukan Melayu.

Apa ertinya ini? Ertinya, daripada 3.2 juta undi yang diperolehi oleh UMNO hanya 2.72 juta sahaja orang Melayu, jika jumlah pengundi Melayu ialah 7 juta orang, maka Melayu yang tidak undi UMNO adalah sebanyak lebih 4 juta orang.

4 juta Melayu tidak undi UMNO.

Jadi bagaimana UMNO boleh mendabik dada mengisyiharkan mereka mewakili majoriti Melayu? Sedangkan, lebih ramai Melayu tidak undi UMNO.

Ini menjawab soalan ‘adakah orang Melayu mati jika UMNO di tolak?’ Jika UMNO ditolak, hanya 1 orang Melayu akan kecundang. 4 orang Melayu lain boleh terus hidup.

Pengajarannya ialah: orang Melayu secara mutlaknya, tidak memerlukan UMNO untuk terus hidup.

Mereka sebetulnya memerlukan sebuah kerajaan yang adil dan melaksanakan dasar-dasar yang adil dan saksama. Mereka memerlukan undang-undang lebih daripada memerlukan UMNO.

Lebih penting, mereka memerlukan pemimpin yang amanah, jujur, tidak rasuah, tidak mencuri wang rakyat, dan bukan pembohong bersiri.



Sambutan ulangtahun ke-69 pemimpin reformasi, Datuk Seri Anwar Ibrahim di Perkarangan Penjara Sungai Buloh dihadiri orang ramai serta pimpinan Pakatan Harapan dan NGO demi menyatakan solidariti bersama keluarga beliau dan berpidato termasuk Ketua Parlimen DAP Lim Kit Siang, Setiausaha Publisiti DAP Kebangsaan Tony Pua, aktivis DAP Young Syefura Othman dan ramai lagi termasuk

Sasterawan Negara Datuk A. Samad Said juga hadir mendeklamasikan sajak. Kit Siang yang juga Ahli Parlimen Gelang Patah dalam ucapannya menyebut, "Jika Anwar menjadi Perdana Menteri pada 2013 lalu, Malaysia tidak akan terjebak dalam skandal 1MDB, tidak akan ada saman dari Jabatan Kehakiman (DOJ) yang mencemarkan reputasi negara dan kita tidak akan dilabel sebagai negara kleptokrasi."

